





内閣文庫	
番號	漢 2231
冊數	80 (36)
函號	281 40





明史藁

列傳第二十九

光祿大夫

經筵講官明史總裁戶部尚書加七級臣王鴻緒奉

敕編撰

姚廣孝

郭資

張玉

譚淵

朱能

丘福

李遠

張王

忠真

張武

陳珪

李濬

徐祥

孟善

孫岩

房勝

陳賢

陳志

張信

唐雲

陳亨

徐理

徐忠

陳旭

趙彝

郭亮

姚廣孝。長洲人。本醫家子。年十四。度為僧。名道衍。字斯道。讀



7320

書工詩。事道士席應真。得其陰陽術數之學。然時無知者。獨里人王行。識爲非常人。嘗游嵩山寺。相者袁珙曰。是何異僧。目三角。形如病虎。性必嗜殺。劉秉忠流也。道衍大喜。益自負。洪武中。選高僧。以病免。又詔通儒書僧試禮部。不受官。賜僧服。還經北固山。懷古賦詩。其儕宗泐見之曰。此豈釋子語。道衍笑不答。高皇后崩。帝命諸王與一高僧。誦經爲薦福。於是宗泐爲左善世。舉道衍。燕王與語甚合。請於帝。從至北平。住持慶壽寺。常居府中。跡愈密。時時屏人語。初懿文太子薨。皇太孫監國。仁厚好文。中外屬望。惟燕王不平。常懷窺覷。而其陰謀。發自道衍。帝崩。太孫立。削諸王。畏燕強未發。道衍勸王反。王曰。民心向彼。柰何。道衍曰。臣知天道。何論民心。乃進袁

珙及卜者余忠。自是燕府陰事。一切與道衍謀。常選將校勾軍卒。收材勇異能之士。燕王居元故宮。道衍練兵後苑。穴地作重屋。周繚厚垣。密甃甌甌瓶缶。日夜鑄軍器。畜鵝鴨亂其聲。久之。謀益露。上變者日甚。燕王詢道衍師期。曰。未也。燕王始稱病。既稱病亟。會詔逮府中官屬。都指揮張信。輸誠牀下。燕王遂決策。適大風雨驟至。簷瓦墮地。燕王色變。道衍曰。祥也。飛龍在天。從以風雨。瓦墮將易黃也。遂起兵。以誅齊黃爲名。號其衆曰靖難之師。道衍輔世子居守。朝廷發大兵討之。數攻北平薄城。築壘守甚固。擊却攻者。夜縋壯士。劫傷南兵。援師至。內外合擊。斬首無算。大將李景隆平安等後先遁。燕王圍濟南三月。道衍馳書曰。師老矣。請班師。乃還。復攻東昌。

戰敗亡張玉復還。王意怠欲稍休。道衍力趣之。益募勇士。敗盛庸。破房昭西水寨。道衍語王。毋下城邑。疾趨金陵。金陵單弱勢必舉。從之。燕王卽帝位。授僧錄司左善世。帝在藩邸。所接皆武人。獨道衍定策起兵。及帝轉戰山東。諸將悉從。北平官吏惟道衍與郭資輩。二三文臣居守。而帝在軍三年。或旋或否。戰守機事。皆決於道衍。道衍未嘗臨戰陣。然帝用兵有天下。道衍力爲多。錄功以爲第一。永樂二年。拜資善大夫太子少師。復其姓。賜名廣孝。贈祖父如其官。帝與語。呼少師而不名。命蓄髮不膏。賜第及兩宮人。皆不受。常居僧寺冠帶。朝退衣緇衣。出賑蘇湖。至長洲。以賜金帛。散宗族鄉人。少時與王賓高啓輩善。爲啓北郭十友之一。至是賓猶存。徒步往訪。

歡若平生。賓爲作賑災記。以鋪陳其功。道闡門。見酒帘書甚工。呼問乃一少年。養以爲子。歸白於帝。賜名繼。使侍東宮。讀書文華殿。廣孝嘗監修太祖實錄。又與解縉等纂修永樂大典。書成。帝褒美之。帝往來兩都。出塞北征。廣孝留輔太子於南京。永樂十六年入覲。年八十有四矣。病甚不能朝。仍居慶壽寺。命從者曰。天子且至。頃之車駕臨幸。語甚歡。賜以金唾壺。問所欲言。廣孝曰。僧溥洽繫久。願赦之。帝卽坐命出焉。溥洽者。建文帝王錄僧也。廣孝頓首謝。將死刻期告門人。及期斂衽端坐而逝。帝聞震悼。輟視朝二日。命有司治喪。以僧禮葬。官養子繼尙寶少卿。又召其弟姪二人。賜資遣還。追贈推誠輔國協謀宣力文臣。特進榮祿大夫。上柱國榮國公。諡恭。

靖賜葬房山縣東北。帝親製神道碑誌其功。仁宗元年。加贈少師。配饗太廟。世宗九年。諭輔臣曰。姚廣孝佐命嗣興。勞烈具有。顧係釋氏之徒。班諸功臣。並食於太祖側。恐不足尊敬。祖宗於是尙書李時。同大學士張璁。桂萼等議。廣孝懋著帷幄之謀。生前旣酬以顯爵矣。若霑榮俎豆。允非所宜。請移大興隆寺。太常春秋致祀。庶宗廟血食之禮。秩然有則。而朝廷報功之意。兼盡無遺。詔曰可。

郭資。武安人。洪武十八年進士。累官北平左布政司。燕王有異志。深結資。資亦陰附託。王旣殺張昺等。資與左參政孫瑜。按察司副使墨麟。僉事楊恭。率先朝燕王呼萬歲。王悅。仍其官。師行。留資輔世子居守。王轉戰二年。資主給軍餉。及稱帝。

爲戶部尙書。命掌北平布政。建北京。改刑部尙書。定都復爲戶部尙書。時營城郭宮殿。置官吏。又出塞北征。工役繁興。資舉職無廢事。仁宗立。以舊勞。兼太子賓客。帝寬厚而資刻覈。不稱旨。以足疾加太子太師致仕。宣德三年。夏。原吉輟部務。起資掌其事。奉職益勤。卒贈湯陰伯。謚忠襄。官其子佑戶部主事。資治錢穀有能稱。仁宗嘗以問楊士奇。對曰。性強毅。人不能干以私。然蠲租詔數下。不奉行。使陛下恩澤不流者。資也。

張玉。字世美。祥符人。仕元樞密知院。元亡。從走漠北。洪武十八年來歸。從大軍出塞。至捕魚兒海。以功授濟南衛副千戶。從征粉紅帖木兒。抵延州。遷安慶衛指揮僉事。又從征遠順。

散毛諸洞。北逐蒙古之侵邊者。至鴉寒山。還調燕山左護衛。從燕王出塞。至黑松林。又從征野人諸部。以驍果善謀畫。爲王所親任。建文元年。王起兵。用玉策奪北平九門。撫諭城內外。三日而定。師將南。玉獻計東攻薊州。執殺馬宣曾濬。遂定薊。趨遵化。選勇士四鼓登陴。開城門納軍。軍盡入守將始覺。錯愕迎降。分兵下永平密雲。皆致其精甲以益師。擢都指揮僉事。掌中營兵。是時都督徐凱軍河間。潘忠楊松軍鄭州。長興侯耿炳文以三十萬衆軍真定。玉說王曰。潘楊勇而無謀。可襲而俘也。王乃以玉將親兵爲前鋒。抵樓桑。值中秋。南軍方宴會。夜半疾馳破雄縣。忠松來援。邀擊月漾橋。生禽之。遂克鄭州。自以輕騎覘炳文軍。還言軍無紀律。其上有敗氣。急

擊勿失。王遂引兵西至無極。王顧諸將。今兵宜何嚮。諸將以南軍方盛。請屯新樂。玉曰。彼雖衆皆新集。我軍乘勝徑趨真定。破之必矣。王曰善。吾倚玉足濟大事。明日抵真定。大敗炳文軍。獲左右副將軍李堅甯忠都督顧成等。斬首三萬。復敗安陸侯吳傑軍。南軍由是不振。江陰侯吳高以遼東兵圍永平。曹國公李景隆引兵數十萬攻北平。王與玉謀。先援永平。至則高遁走。玉追斬甚衆。因說王曰。大寧去此不遠。襲之必克。遂從劉家口襲大寧。自辰至午破其城。殺都指揮朱鑑。還救北平。直擣景隆營。鄭村壩大戰三日。景隆大敗。乘勝抵城下。鼓譟出表裏夾攻。南軍圍者亦大敗遁去。從攻廣昌蔚州大同。諜報景隆收潰卒號百萬。且復至。玉曰。兵貴神速。請先

據白溝河。以逸待勞。遂往駐河上三日。景隆至。以精騎馳擊。復大敗之。追奔至濟南。圍其城。已而解圍還。破滄州。擒徐凱。進攻東昌。與盛庸軍遇。王以數十騎繞出其後。庸圍之數重。王奮擊得出。玉不知王所在。突入陣中。戰愈力。格殺數十人。被創死。年五十八。燕師起。轉鬪三年。鋒銳甚。至是失大將。一軍奪氣。師還北平。諸將叩頭請罪。王曰。勝負兵家常事。不足計。恨失玉耳。因泣不能止。諸將皆泣。其後譚淵歿於夾河。王真歿於淝河。王雖悼惜。不如玉也。建文四年秋。王稱帝。贈玉都督同知。已追贈榮國公。諡忠顯。仁宗卽位。加封河間王。改諡忠武。侑享成祖廟庭。子三長輔。次輓。次軌。從子信。輔自有傳。輓以功臣子。爲神策衛指揮使。正統五年。英國公輔訴輓。

毆守墳者。斥及先臣。詞多悖慢。帝命錦衣鞠實錮之。尋釋。三遷至中府右都督。皆領宿衛。景泰三年。加太子太保。英宗復位。以軌迎立功。并封輓文安伯。食祿千二百石。天順六年卒。贈侯。諡忠僖。子斌嗣。坐詛呪論死。赦免。奪爵。官其子羽。爲指揮使。軌永樂中。入宿衛。爲錦衣衛指揮僉事。從宣宗征高煦。又從成國公朱勇出塞。至蘊帽山。正統十三年。以副總兵征麓川。還討貴州叛苗。積功爲前府右都督。總京營兵。與石亨曹吉祥善。景泰二年。坐驕淫不道。下獄。尋釋。景帝不豫。同享吉祥。迎上皇南城。封太平侯。食祿二千石。性險暴。子謙。王女范廣之死。軌有力焉。旣得志。益橫。納賄亂政。亞於亨。吉祥。天順二年卒。卒時見廣爲祟云。贈裕國公。諡勇襄。子瑾嗣。侯。成

化二年革奪門功。奪侯與指揮使。信舉建文二年鄉試第一。永樂中。歷刑科都給事中。數言事。擢工部右侍郎。河決開封。遣信視之。請疏魚王口至中澗。故道二十餘里。繪圖以進。詔如其議。役十萬人浚之。決遂塞。出治浙江海塘。坐事謫交阯。洪熙初。召為兵部左侍郎。帝嘗從容謂英國公輔。公有昆季在。可加恩乎。輔頓首言。輒軌蒙上恩。以臣故備近侍。然奢侈好酒色。獨從兄侍郎信。賢可使也。帝召見信曰。是英國公兄耶。趣武冠冠之。以為錦衣衛指揮使。理刑七年。以忠恕稱。宣德六年。遷四川都指揮僉事。在蜀十五年。以錦衣衛帶俸。都指揮同知致仕。命其子嗣職。

譚淵。清流人。父勝。洪武中。為燕山右護衛副千戶。淵嗣職。燕王起兵。從奪九門。破雄縣。邀擊潘忠。楊松於月漾橋。率壯士千伏水中。人持一束芟。蒙頭通鼻息。南軍已過。即出據橋。忠等戰敗。趨橋不得渡。遂見擒。轉戰常為前鋒。累進都指揮同知。淵驍勇善戰。引兩石弓。發無不中。然性嗜殺。滄州破。王命給牒散降卒。未遣者三千餘人。待明給牒。淵一夜盡殺之。王怒。淵曰。此曹皆壯士。釋之為後患。王曰。如爾言。當盡殺敵。敵可盡乎。淵慚而退。夾河之戰。南軍動塵起。淵遽前搏戰。馬蹶被殺。王痛之。即位。贈都指揮使。已追封崇安侯。諡壯節。立祠祀之。子忠襲官。從入京有功。以淵故。封新寧伯。祿千石。永樂二十年。將右掖從征沙漠。宣德元年。從定樂安。三年。坐征交阯失律。下獄論死。已得釋卒。子璟乞嗣。吏部言。忠罪死。不當

世爵。帝曰。券有免死文。其子嗣。璟傳子裕及祐。祐守法好禮。成化中。協守南京。還掌前府。提督團營。累加太傅。嗣伯。六十九年而卒。諡莊僖。子綸嗣。嘉靖十四年。佩征蠻將軍印。充總兵官。鎮湖廣。勦九溪蠻。有功。益祿。坐占役軍奪爵。卒。子功承嗣。卒。子國佐嗣。明亡爵絕。

王真。咸寧人。洪武中。起卒伍。積功至燕山右護衛百戶。燕師起。攻九門。戰永平。真定。下廣昌。徇廌門。從破滄州。追南兵至滑口。俘獲七千人。累遷都指揮使。王設伏淝河。令真與白義劉江各百騎誘平安軍。安少敵急擊之。真等佯走誘安。入伏內。兩軍鏖。真率壯士突而前。斬馘無算。後不繼。南軍圍之。數匝。真被數十創。氣愈奮。連格殺數十人。圍益急。真顧左右曰。

吾義不死敵手。遂自刎。成祖卽位。追封金鄉侯。諡忠壯。真勇健。有智畧。臨陣應敵。出奇制勝。常以一當百。成祖每追悼之。曰。真不死。功當冠諸將。仁宗時。追封寧國公。加號効忠。配享成祖廟庭。子通自有傳。

朱能。字士弘。懷遠人。父亮。元末結義兵。保鄉里。後從太祖渡江。積功爲副千戶。能嗣職。事燕王藩邸。嘗從北伐。取元太尉朶兒不花覆其軍。王起兵。能與張玉首謀。殺張昺。謝貴。奪九門。擢指揮同知。拔薊州。殺馬宣。取遵化。從攻雄縣。破其東門。逐北至月漾橋。執楊松。潘忠。降其衆於鄭州。長驅至真定。大敗耿炳文軍。獨與敢死士三十騎。追奔至滹沱河。躍馬大呼。突炳文軍。軍數萬人皆披靡。蹂藉死者甚衆。降二千餘人。進

都指揮僉事。從援永平。走吳高。襲定大寧。還破李景隆軍於壩上。盡破南軍之攻九門者。從攻廣昌蔚州大同。戰白溝河。爲前鋒。再敗平安軍。追至濟南華山。安軍乘高陳。能以奇兵繞其後。襲破之。降萬餘人。進都指揮同知。從攻滄州。破東門入。斬首萬餘級。東昌之戰。盛庸鐵鉉圍王數匝。安兵又至。圍益急。能率周長等殊死鬪。翼王潰圍出。遷都指揮同知。復從王戰夾河。譚淵死。燕師挫。能至戰。再捷。軍復振。又與安戰藁城。三戰三敗之。追奔至真定。畧地彰德定州。破西水寨。敗南軍於衡水。獲指揮賈榮。克東阿東平。盡破汶上諸寨。至泚河。王真戰死。戰齊眉山。安兵又大捷。諸將議旋師。能獨按劍曰。漢高十戰九敗。終有天下。今舉事連得勝。小挫輒歸。更能北

面事人耶。王說。遂決意引兵南。安等合兵六十萬。依潼山爲陳。能率李遠等四面攻。大敗安銀牌軍。都督陳暉來援。又敗暉。生擒裨將以下三十餘人。降十萬衆。累遷右軍都督僉事。進克泗州。渡淮。敗庸兵。拔盱眙。下揚州。渡江入金川門。論功爲奉天靖難推誠宣力武臣。特進榮祿大夫。右柱國。左軍都督府左都督。成國公。食祿二千五百石。與世券。永樂二年。兼太子太傅。加祿千石。四年。佩征夷將軍印。率二十五將軍兵八十萬討安南。帝親送之龍江。行次廣西龍州。卒於軍。年三十七。能於諸將中。最年少。善戰。張玉善謀。王倚爲左右手。玉戰歿。軍中進止悉諮能。能身長八尺。雄毅開豁。善撫士卒。卒之日。將校皆爲流涕。洪熙時。追封東平王。諡武烈。配享成祖。

廟庭。子勇嗣。勇以元勳子。特見任用。歷掌都督府事。留守南京。永樂二十二年。從北征。宣德元年。從平漢庶人。復從征沙漠。張輔解兵權。勇代之。見南北諸軍。備邊轉運。錯互非便。請專令南軍轉運。北軍備邊。又言。京軍多遠戍。非居重馭輕之道。請選精兵十萬益之。又請令公侯伯都督子弟操練。皆報可。正統九年。出喜峯口。擊朵顏諸部。至富峪川。獲少兵。部尙書徐晞劾勇。不會諸軍深入。遽旋師。宜治罪。命宥之。尋論功。加太保。勇頰面虬鬚。狀貌甚偉。而勇畧不足。以敬禮士大夫得名。以故得久典兵柄。十四年。從駕至土木。也先驟至。勇迎戰。冒入鷄兒嶺。中伏死。騎五萬人皆沒。于謙等追劾奪封。景泰元年。勇子儀乞葬祭。帝曰。勇爲大將。喪師辱國。致陷乘輿。

可以公禮葬耶。已又請襲朝議。難之。禮部尙書胡濙儀婦翁也。爲營解。乃以立東宮恩。嗣公減歲祿至千石。天順初。追封勇平陰王。謚武愍。儀掌中軍都督府事。守備南京。三十餘年。卒。贈太師。謚莊簡。子輔嗣。守備南京。先後十七年。卒。贈太傅。謚恭僖。傳子麟。及鳳。鳳卒。贈太保。謚榮康。子希忠嗣。世宗南巡。掌行在左府事。至衛輝。行宮夜火。侍衛倉卒。不知駕所在。希忠與都督陸炳翼帝出。由是被恩遇。入直西苑。歷掌右後兩府事。總兵神機營。提督十二團營。及五軍營。累加太師。益歲祿七百石。代郊天者三十九。賞賚不可勝紀。卒。追封定襄王。謚恭靖。萬曆中。給事余懋學疏論。追奪王爵。弟希孝亦至都督。加太保。卒。贈太傅。謚忠僖。希忠四傳。至曾孫純臣。崇禎

時屢掌營府。爲帝所倚任。李自成薄京師。手救純臣。總督中外諸軍。輔立太子。敕未至。城已陷。爲賊所殺。福王立。贈舒城王。

丘福。鳳陽人。起卒伍。事燕王藩邸。積年勞。爲燕山中護衛千戶。燕師起。與朱能張玉首奪九門。大戰真定。突入子城。戰白溝河。以勁卒擣中堅。夾河滄州靈璧諸大戰。皆爲軍鋒。盛庸兵扼淮。福與能將數百人。西行二十里。自上流潛濟。猝薄南軍。鳴砲。南軍驚。突其陳。陳動庸走。盡得戰艦。軍乃得渡淮。以功累遷。至都督僉事。福爲人樸。鷙鷲勇。畫謀智計不如玉。敢力戰。深入與能埒。每戰勝。諸將爭前效。鹵獲。福獨後。王每嘆曰。丘將軍功。我自知之。卽位大封功臣。第福爲首。曰奉天靖

難。推誠宣力武臣。特進榮祿大夫。右柱國中軍都督府左都督。淇國公。食祿二千五百石。與世券。漢王高煦數將兵有功。成祖愛之。福武人與善。數勸立爲太子。帝猶豫久之。竟立仁宗爲太子。而福爲太子太師。加歲祿一千石。永樂七年七月。出塞至臚胸河。敗歿。先是本雅失里殺使臣郭驥。帝大發兵討之。命福佩大將軍印爲總兵。武城侯王聰。同安侯火真爲左右副總兵。靖安侯王忠。安平侯李遠爲左右參將。以十萬騎行。帝知福敢戰輕敵。陛辭日。諭以兵事須慎重。自開平以北。卽不見寇。宜時時如對敵。日夜謹斥候。勿易敵爲所給。已行。又賜敕戒諭。福出塞。以千餘人。先至臚胸河南。遇游騎擊敗之。遂渡河。獲其尙書一人。飲之酒。問本雅失里今安在。荅

言聞大兵來，惶恐欲北走。去此可三十里，福大喜曰：「當疾馳擒之。」諸將請俟諸軍集，偵虛實而後進。福不從，以尚書爲鄉導，直薄敵營與戰，相持二日。每戰敵輒佯敗引去，福銳乘之。安平侯諫曰：「將軍輕信敵間，懸軍轉鬪，敵示弱誘我深入，進必不利。退則懼爲所乘，獨可結營自固，晝揚旗伐鼓，出奇兵與挑戰。夜多燃炬鳴砲，張軍勢使彼莫測。俟我軍畢至，併力攻之，必捷。否亦可全師而還。」始天子與將軍言，何如而遂忘之乎？武城侯亦力言不可，福皆不聽。欲遣同安侯往敵營詐求和，率精騎劫之。未行，福厲聲曰：「違命者斬！」卽先馳麾士卒行，控馬者皆泣下。諸將不得已與俱。俄而敵騎大至，圍之數重。武城侯戰死，福及諸將皆被執遇害。一軍皆沒。帝震怒，以

諸將無足任者，決親征，奪福世爵，徙其家海南。李遠懷遠人，父實爲蔚州衛指揮僉事。遠嗣官。燕王攻蔚州，遠與指揮王忠舉城降。南軍駐德州，運道出徐沛間，遠以輕兵六千，僞爲南軍袍鎧，入插柳一枝於背，徑濟寧沙河至沛，無覺者。焚糧舟數萬而還。河水盡熱，南將袁宇三萬騎來追，伏兵擊斬萬人。燕軍駐蠡縣，遠分哨至藁城，遇德州裨將葛進，步騎萬餘，乘冰渡滹沱河，及其半渡擊之，進繫馬林間，以步兵接戰，遠引却誘之，而分兵出其後，解所繫馬，前奮擊，進失馬遂大敗，斬首四千，獲馬千匹。王賜書嘉勞，曰：「將軍以輕騎八百，破敵數萬，出奇應變，雖古名將不過也。累功爲都督僉事，封安平侯，食祿千石，予世券。遠沈毅有膽畧，言論激昂，自許忠義，旣

燒賊舟。賊屯補陀山。斌直擣其營。多殺傷。絕援。被擒。不屈。賊支解之。官爲建祠。曰忠勇。

張武。瀏陽人。豁達有勇力。稍涉書史。爲燕山右護衛百戶。從燕王起兵。克薊州。取雄縣。擒斬首將。據月漾橋。敗兩都督。乘勝抵鄭州。乃還。已與諸將。敗長興侯於滹沱河。夾河之戰。率壯士爲前鋒。突陣。陳亨敗走。南軍追之。武還擊。南軍潰。攻西水寨。前軍夜失道。南軍追急。武引兵伏要害。乃不得進。戰小河。陳文歿於陣。武率敢死士。自林間突出。與騎兵合。遂大破南軍。論功。由指揮使。累遷都督僉事。進同知。封成陽侯。祿千五百石。位次朱能下。爲徹侯第一。次陳珪。鄭亨。孟善。火真。顧成。王忠。王聰。徐忠。張信。李遠。郭亮。房寬。共十三人。武還守北

平。永樂元年卒。出內廄馬以賻。贈潞國公。諡忠毅。無子。爵除。陳珪。泰州人。從大將軍平中原。授龍虎衛百戶。改燕山中護衛。從燕王出塞。爲前鋒。進副千戶。已從起兵。積功。至指揮同知。還佐世子居守。累遷都督僉事。封泰寧侯。祿千二百石。佐世子居守如故。永樂四年。董營北京宮殿。八年。帝北征。輔趙王留守北京。兼掌行在後府。經畫有條理。甚見獎重。年八十五卒。贈靖國公。諡忠襄。子愉嗣。二十年。從北征。失律。下獄死。愉。庶兄璽。自以功。爲指揮使。先卒。子鐘。已襲職。至是與愉子鏞爭嗣。詔許鐘。傳子灝。及瀛。瀛歿。土木。贈寧國公。諡恭愍。弟涇嗣。天順五年。佩征蠻將軍印。充總兵官。鎮廣西。涇無才能。徒以會昌侯孫忠。壻重寄。七年。將數千人。駐梧州。大藤賊

數百人夜半梯而入。執副使周壽。殺僂無算。涇擁兵不救。及明遣人與賊講。良久乃去。縱壽還。事聞徵還。副都御史吳禎發其狀。涇因訐禎。俱下獄。涇論斬。復以會昌侯故復爵。奪俸三年。而禎竟戍鐵嶺。成化初。協守南京。充漕運總兵官。卒。子桓嗣。弘治初。佩征西將軍印。鎮寧夏。中貴人多遣所親隸麾下。欲冒功賞。桓拒絕之。反爲所譖。召還卒。子璇嗣。卒。子儒嗣。卒。無子。璇弟璉。珮。相繼得嗣。璉卒。子良弼嗣。萬曆中。守備南京。又一傳。而明亡。

李濬。和州人。父旺。洪武中。燕山左護衛副千戶。濬嗣官。燕師起。奪九門。攻居庸。克薊州。募兵密雲。攻松亭關。破南軍於真定。從收大寧。鄭村壩之戰。率精騎突陣。衆鼓譟乘之大捷。轉

戰山東。爲前鋒。至小河。猝與南軍遇。率敢死士。先斷河橋路。南軍不能爭。王至。遂大敗之。累遷都指揮使。封襄城伯。祿千石。永樂元年。出鎮江西。永新盜起。捕誅其魁。尋召還卒。子隆字彥平。年十五。嗣封。雄偉有將略。數從北征。出奇料敵。成祖器之。旣遷都。以南京根本地。命留守。仁宗卽位。移鎮山海。未幾復守南京。隆讀書好文。論事侃侃。清慎守法。尤敬禮士大夫。在南京十八年。先後賜璽書二百餘。及召還。南都民流涕送之江上。正統五年。入總禁軍。十一年。巡邊大同。賜寶刀一。巾飭戒備。內外凜凜。迄還不僂一人。明年卒。子珍嗣。從北征。歿於土木。贈侯諡悼僖。庶兄璉。貌寢不得嗣。弟瑾嗣。成化三年。四川都掌蠻叛。命佩征夷將軍印。充總兵官。往討。兵部尙

書程信督之。師至永寧分道進。都督芮成由戎縣。巡撫貴州都御史陳宜參將吳經由芒部。都指揮崔旻由普市水腦。南寧伯毛榮爲左哨。由李子關。巡撫四川都御史汪浩參將宰用爲右哨。由渡船舖。左右遊擊將軍羅秉忠穆義由金鷺池。而瑾與信居中節制之。榮伐木開道。壘石梁以濟師。分攻勇播諸寨。賊敗遁深箐中。官軍盡焚其廬舍積聚。諸道兵窮追。轉戰六日。破龍背豹尾諸寨。七百五十餘。困倉三千八百餘。斬首千五百。明年至大壩。攻三都六鄉。焚寨千四百五十。困倉九百八十。斬首三千有奇。獲銅鼓六十三。鎧仗孳畜無算。分捕山谷間。按誅九姓不奉化者。乃遷瀘州衛於渡船舖。增置關堡。改大壩爲太平川。長官司分都掌地。設官建治控制。

之。師還進侯。加太子太傅。弘治初卒。贈芮國公。諡壯武。瑾性寬弘能下士。待兄璉甚厚。璉卒。撫其子瑋如己子。瑾子黼嗣伯。數年卒無子。瑋得嗣。四傳至守銜。累典營務。加太子少保。崇禎初。召對稱旨。命總督京營。坐營卒爲盜。落職憂憤卒。子國禎嗣。輕佻好戲。便佞有口。嘗召對指陳兵勢。纏纏可聽。帝信以爲才。十六年。命總督京營倚任之。益以口舌取寵。於訓練戰守之策。懵如也。時尺籍雖虛。然尙可得十餘萬人。國禎雅不以爲意。明年三月。賊長驅薄城下。始遣兵登陴。再宿而城陷。突崇文門不得出。復奔朝陽門。守將孫如龍迎賊。張能於城上。勒國禎降。國禎解甲聽命。能羈守之。責賄不足。請還家斂貲。家已爲他賊據。不得入。被拷折踝。以荆筐曳還。能

置酒戲之曰。大將軍狼狽乃爾耶。是夕以所繫條自縊死。
徐祥。大冶人。初爲漢萬戶。歸太祖於江州。積功爲燕山右護
衛副千戶。燕王以祥謹直。命侍左右。從起兵奪九門。破居庸
關。進指揮僉事。從取懷來。破雄縣。追戰鄭真定。援永平。走遼
東兵。出劉家口。破大寧。敗南軍於鄭村壩。進指揮同知。尋擢
北平都指揮僉事。破廣昌。克蔚州。攻大同。大戰白溝河。攻濟
南。取滄州。進都指揮同知。克威及深。鏖夾河藁城。掠順德。襲
彰德軍。破西水寨。敗其援師。拔東阿東平汶上。抵鳳陽。奪河
南橋。小河壩。鳳凰山。與大軍會齊眉山。戰靈璧。取泗盱。賒渡
江入金川門。進都指揮使。封興安伯。祿千石。時封伯者。祥及
徐理。李濬。張輔。唐雲。譚淵。孫岩。房勝。趙彝。陳旭。劉才。王佐。陳

瑄十三人。祥第一。祥在諸將中年稍長。及封益勤慎。永樂二
年卒。子永早歿。孫亨嗣。十二年。從北征。爲中軍副。至土刺河。
獲馬三千。還守開平。將輕騎往來興和。大同備邊。二十年。從
征兀良哈。至屈裂河。明年。從征阿魯台。將右掖至陰山而還。
明年。復出至半邊山。西路。宣德元年。以右副總兵。從黔國公
征交趾。無功。奪爵。英宗卽位。復給之。正統九年。征兀良哈。出
界嶺口。河北川。進侯。出鎮陝西。召還。天順初卒。謚武襄。子賢
嗣。伯。以跛給半祿。家居。免朝謁。卒。子盛嗣。卒。無子。再從弟良
嗣。良祖母故小妻也。良父旣生。祖繼娶定襄伯郭登女。至是
其孫爭襲。朝議以郭氏初嘗適人。法不當爲正嫡。良竟得嗣。
良時年五十。家貧。傭大中橋汲水。都督府求興安伯後。良乃

謝其隣而去。僉書南京中府。忤劉瑾。革祿二百石。傳爵至明亡乃絕。

孟善。海豐人。仕元爲山東樞密院同僉。明初歸附。隸大將軍麾下。從北征。授定遠百戶。從傅友德征雲南。進燕山中護衛千戶。從征漠北。燕師起。攻松亭關。戰白溝。皆有功。已守保定。南軍數萬攻城急。城中兵才數千。善固守。城完。累遷右軍都督同知。封保定侯。食祿千二百石。永樂元年。鎮遼東。遠人款附。七年。召還北京。卒。贈滕國公。諡忠勇。子瑛嗣。將左軍。兩從北征。仁宗卽位。鎮交趾。爲左參將。瑛庶兄賢。爲常山護衛指揮。坐謀逆死。并奪瑛爵。毀券。謫雲南安置。宣德六年。放還。充爲事官於宣府。英宗卽位。授京衛指揮使。卒。子俊嗣官。天順

初。以恩詔與伯爵卒。子昂乞嗣。吏部執不許。中旨與昂嗣。伯卒。子達乞嗣。伯者三。終不許。仍與指揮使。爵除。

孫岩。鳳陽人。明初爲金吾衛百戶。守鳳陽。調燕山右護衛。以中護衛致仕。燕師起。通州指揮僉事房勝以城降。王以岩宿將。使岩與勝守通州。王無反顧憂。遂東定薊州密雲。而居庸懷來。皆不能守。南軍大至。圍州城數周。起土山臨城。攻西門。毀樓堞。岩勝多方捍禦。已復突門力戰。追奔至張家灣。掠餉舟三百。平安率遼東兵十萬來攻。敗去。岩勝皆累擢都指揮僉事。燕王稱帝。封岩應城伯。食祿千石。永樂十一年。備開平。旋移通州。以私憾椎殺千戶。奪爵安置交趾。已而復之。十六年卒。贈翼城侯。諡威武。子亨先積功爲河南都指揮僉事。至

是嗣伯傳子英及傑。傑坐法再下獄。得釋充總兵官。鎮山海永平。坐棄所守地論死。從石亨立功復爵。卒子繼先嗣。成化九年受賊當死。免革爵。十三年復冠帶。卒子鉞嗣。鉞子岱有疾不得嗣。以岱子永爵嗣。傳至明亡爵除。房勝景陵人。初從陳友諒來歸。累功至通州指揮。既降以守城功封富昌伯。世指揮使。

陳賢壽州人。初從太祖立功。授雄武衛百戶。從西平侯征西番。潁川侯征雲南。永昌侯征迤北。至捕魚兒海。皆有功。歷燕山右護衛指揮僉事。燕師起。從諸將出戰。常突陣陷堅。軍中稱其驍勇。累遷都督僉事。成祖既大封功臣。慮有遺闕。令丘福等議。福等言。陳賢張興陳志王友功與劉才等。於是四人

並封。賢封榮昌伯。祿千石。卒。子智前立功為常山右護衛指揮。嗣伯久之。以參將鎮交趾。佩征夷將軍印。懦不能軍。又與都督方政相失。賊至禦之。敗績。奪爵充為事官。從王通立功。尋棄地還。下獄得釋。正統初復為指揮使。卒。子孫世襲指揮使。張興壽州人。起卒伍為燕山左護衛指揮僉事。從起兵。大小戰皆與功多。累遷都指揮同知。每戰從子勇常為肘腋。與單騎追敵。被數十創。傷重不任戰。勇嗣指揮使。代將其兵。第功封興安鄉伯。祿千石。勇遷都指揮同知。興卒無子。勇嗣伯。永樂八年從北征失律。奪爵謫交趾。赦還復爵。卒。子安嗣。正統十三年出鎮廣東。黃蕭養寇廣州。安率舟師。遇賊賊船。澳安方醉臥。官軍不能支。退至沙角尾。賊薄之。軍潰安溺死。無

子弟寧嗣。子愷犯法。連坐下獄。贖罪還爵。弘治中卒。再傳至孫坤。卒。子鐸嗣。卒。弟鉉嗣。三傳至曾孫光燦。流寇陷京城。被殺。陳志。巴人。洪武中。爲燕山中護衛指揮僉事。從起兵。大小戰皆與功多。累遷都指揮同知。封遂安伯。祿千石。志素以謹受知。勦力戎行。始終不懈。永樂八年卒。長子良。坐罪謫死。次子春。數從志破敵。累功至指揮僉事。先志卒。其子瑛嗣官。比志卒。瑛與良子瑄爭襲。帝命呼二子。闡決之。竟爲瑛得。屢從出塞。鎮永平山海。還掌前府。操備右掖軍。復出鎮薊州。城雲州獨石。爽鬪有將材。然貪殘人多怨者。卒。子墳嗣。歿於土木。諡榮懷。無子弟。詔嗣。坐受賂謫遼東。立功尋復爵。弘治初。領三千營。加太子太傅。卒。孫鏞嗣。總薊州兵。朶顏入寇。禦却之。

嘉靖初。敘奉迎功。加太子太保。提督團營。掌前府。進少保。委寄亞武定侯。嗣伯六十餘年。卒。又五傳而明亡。王友。荊州人。襲父官。爲燕山護衛百戶。從起兵。定京師。累遷都指揮僉事。論功當侯。以驕縱故抑之。永樂元年。以丘福等議。封友清遠伯。祿千石。明年。充總兵官。帥舟師沿海捕倭。倭數掠海上。友無功。帝切責之。已大破倭。帝乃喜。降敕褒勞。尋召還。四年。從征交趾。前驅破敵功多。進侯。加祿五百石。與世券。八年。從北征。督中軍。扈帝深入。別與劉才。築城飲馬河上。帝次五原峰。命友簡銳士。從征阿魯台。尋命休士開平。會謀報知。院失。乃干欲降。帝使別將招之。而令友等受降。不降。卽掩擊。友等至絕漠。與朱乃干距一舍。故迂道往應昌。軍中乏食。多死者。帝

震怒奪其兵付張輔還令羣臣議罪已而赦之十一年坐妾告友夫婦誹謗有驗奪爵下獄明年出獄卒爵除仁宗卽位官其子順爲指揮僉事

張信臨淮人父興永寧衛指揮僉事信嗣官移守普定平越征盤江紫江草塘積功進都指揮僉事建文帝卽位大臣薦信謀勇調北平都司受密詔令與謝貴張昺謀燕盡縛藩府人信憂懼不知所爲母怪問之信詭辭對母愈詰之乃告以故母大驚曰不可汝父每言王氣在燕汝無妄舉滅家族信益憂懼詔趣信急信乃三造燕邸王辭不見信於是乘婦人輿入拜牀下王稱病風不言信頓首曰殿下無恙卽有恙當急語臣王曰余病且困待死爾信曰殿下不以情語臣朝廷

密敕臣執殿下殿下意果無他幸從臣歸命京師卽有意宜告臣王見信稱臣知信誠爲泣下告以密謀立召諸將定計奪九門信隨王至京師論功比諸戰將進都督僉事封隆平侯祿千石與世伯券成祖德信甚時時呼恩張欲納信女爲妃執不可以此益重信凡召太子察藩王動靜諸密事皆命信信怙寵頗驕永樂八年冬都御史陳瑛言信無汗馬之勞遭遇聖明忝冒侯爵不思恭儉以保祿位恣肆貪墨不知屬厭強占丹陽練湖八十餘里江陰官田七十餘頃罔下厲民請下有司驗治帝曰瑛言是也昔中山王有沙洲一區耕農水道所經家僮阻之以擅利王聞卽歸其地於官今信何敢爾命法司雜治之尋以舊勲不問二十年從北征大閱於隰

寧。信辭疾不至。謫充辦事官。已而復之。仁宗卽位。加少師與世侯券。宣德初。從征樂安。帝北征。命居守。尋督軍萬五千人。浚河西務河道。正統七年卒。贈鄖國公。謚恭僖。子鏞自立功。爲指揮僉事。先卒。子淳嗣。卒。子福嗣。卒。弟祐嗣。卒。從弟祿與族人爭嗣。久不決。下法司理。乃得嗣。卒。子瑋嗣。嘉靖中。坐法失侯。已復封。其從子桐爲侯。傳至明亡。爵除。燕兵起時。有唐雲者。不知所自起。爲燕山中護衛指揮。燕王旣殺張昺。謝貴等。指揮彭二。攻端禮門。不克死。將士猶據九門。閉甕城。陳戈戟內向。張玉等帥甲夜襲之。已克其八。惟西直門不下。王令雲解甲騎馬。導從如平時。諭守者曰。天子已聽王自制一方。汝等急退。後者戮。雲於諸指揮中年最長。素信謹。將士以爲

不欺我。遂散。時衆心未附。雲告以天意所嚮。衆乃定。雲從王久。出入左右。王倚任焉。先後出師。留輔世子居守。南兵數攻城。守甚力。戰未嘗失利。王稱帝。封新昌伯。世指揮使。明年秋卒。

陳亨。壽州人。元末揚州萬戶。從太祖於濠。爲鐵甲長。積功擢千戶。從大將軍北伐。守東昌。敵數萬奄至。亨堅壁。越二日出。羸兵數百誘之。敵悉衆來逐。乃率精騎奮擊。大敗之。後從出塞還。徇未下諸城。洪武二年。守大同。累破邊寇。積功擢燕山左衛指揮僉事。數出迤北遼陽。遷北平都指揮使。建文帝卽位。擢都督僉事。燕師起。命亨與劉真卜萬守大寧。移兵出松亭關。駐沙河。將攻遵化。援兵至。退保關。當是時。李景隆率五

十萬衆。將攻北平。北平勢弱。而寧王所鎮大寧。行都司。領興營等二十餘衛。皆西北精銳。朵顏泰寧福餘三衛。元降將所統。番騎曠卒尤驍勇。卜萬將與景隆合。燕王乃以計給亨囚萬間道。疾攻大寧。劉真赴援未至。大寧遂破。亨與諸將徐理房寬劉才等皆降。亨理夜襲走真。盡拔諸軍及三衛騎卒以歸。燕王遂挾寧王入關。自是衝鋒陷陣。多三衛士卒。燕王取天下。自克大寧始。其有功番將。皆授指揮都督。以三衛地畀之。徙行都司於保定。大寧遂棄。而終明之世。三衛常爲邊患云。亨理等既降。累從破南軍。白溝河之戰。亨中創幾死。已攻濟南。與平安戰。華山大敗。創甚。輿還北平。進都督同知。王還軍。親詣亨第勞問之。亡何卒。王自爲文祭。比卽位。追封涇國

公。諡襄敏。長子恭嗣。都督同知。少子懋。初以舍人從軍立功。爲指揮僉事。已而將亨兵。功多。累進右都督。永樂元年。封寧陽伯。祿千石。六年。佩征西將軍印。鎮寧夏。善撫降卒。得其歡心。七年秋。降迤北丞相答卜以下。平章司徒國公十餘人。衆三萬。已而知院迭兒必失。及禿赤伯顏等相繼來降。平章都連等叛去。懋追及之。黑山擒之。盡收所部人口。及孳畜數萬。獻俘京師。進侯益祿二百石。明年。從北征。督左掖。十一年冬。命還寧夏。練兵巡邊。尋命將山西陝西二都司。及鞏昌平涼諸衛兵。俱駐宣府。明年。從北征。仍將左軍大戰。忽失溫與成山侯通。攻敵右。右都督朱崇等乘之。遂大破敵。明年。復之鎮。二十年。復從北征。破敵於屈裂河。別將五千騎。循河東北。捕

殘寇及之山澤中。分二道夾擊殲之。師還。武安侯鄭亨將輜重先行。懋伏隘以待。寇來躡。伏出縱擊。寇死者過半。還京。賜龍衣玉帶。冊其女爲麗妃。明年。將陝西寧夏甘肅三鎮兵。從征阿魯合爲前鋒。諜知寇爲瓦剌所敗。追至宿嵬山。會也先土于諸部落來降。撫之以歸。明年。復從北征。師還。爲殿。仁宗卽位。命掌前府。加大保與世侯。宣德元年。從討樂安。還。仍鎮寧夏。三年。奏徙靈州城。得黑白二兔以獻。宣宗喜。親畫馬賜之。懋在鎮久。威名震漠北。顧恃寵自恣。乾沒鉅萬計。屢被劾。帝曲宥之。命所司徵其贓。懋自陳用已盡。詔貸免。英宗卽位。命偕張輔參議朝政。出爲平羌將軍。鎮甘肅。其冬。寇掠鎮番。懋遣兵援之。解去。以斬獲聞。參贊侍郎柴車劾懋失律致寇。

不疾擊。及自遁去。巧取所遺老弱。冒爲都指揮馬亮等功。受陞賞。宜罪論斬。免死奪祿。家居久之。還祿奉朝請。十三年。福建賊鄧茂七反。都御史張楷討之無功。乃詔懋佩征南將軍印。充總兵官。率京營江浙兵往討。至浙江。有欲分兵先扼海口者。懋曰。若是賊將致死於我。不可。明年抵建寧。時茂七已死。餘賊聚尤溪沙縣。諸將欲屠之。懋曰。是堅賊心也。乃下令招之。賊黨多降。分道逐捕。悉平之。已而沙縣賊復熾。久之不定。會景皇帝立。遂班師。奏捷。言官劾之。帝以賊平不問。仍加大保掌中府。兼領宗人府事。英宗復位。益祿二百石。七年卒。年八十五。贈濬國公。諡武靖。懋修髯偉貌。聲如洪鐘。胸次磊落。敬禮士大夫。靖難功臣。至天順時無在者。惟懋久享祿位。

數廢數起。卒以功名終云。嫡子昭先卒。庶長子晟有罪。弟潤嗣。潤卒。弟瑛嗣。減祿之半。嗣侯十六年。而晟子輔已長。乃令輔嗣。瑛免爲勳衛。輔後坐荒淫失侯。卒無子。復封瑛孫繼祖爲侯。傳子及孫大紀。大紀卒。子應詔嗣。萬曆中。掌前府總督京營。徐理。西平人。太祖時。爲永清中護衛指揮僉事。改營州衛。既降。加都指揮僉事。屢戰皆有功。封武康伯。再傳至孫勇。無子。絕封。房寬。陳州人。洪武中。以濟寧左衛指揮。從魏國公。練兵北平。遂爲北平都指揮同知。移守大寧。寬在邊久。凡山川阨塞。殊域情僞。莫不畢知。然不能撫士卒。燕兵奄至。守將朱鑑戰死。城中縛寬降。戰白溝河。將右軍失利。已而復勝。從克廣昌。彰德。進都督僉事。封思恩侯。祿八百石。世指揮使。永

樂七年卒。劉才。霍丘人。元時爲元帥。太祖定中原。降授百戶。歷營州中護衛指揮僉事。既降。從戰山東。每先登。諸番將從之。數有功。封廣恩伯。世指揮使。永樂八年。從北征。失律。議罪已宥之。尋偕隆平侯張信。築永平山海邊關。二十二年。復從北征。至懷來。以疾還。才恹。幅無華。不爲苟合。亦不輕訾毀人。甚爲仁宗所重。宣德五年卒。

徐忠。合肥人。父用。從太祖爲河南衛副千戶。用老忠嗣官。累從大軍北征。多所俘獲。進濟陽衛指揮僉事。洪武末。鎮開平。燕王破居庸。克懷來。忠遂以開平降。從徇灤河。與陳旭等。拔其城。功最。李景隆攻北平。燕王還救之。置五軍。張玉將中軍。朱能將左軍。李彬將右軍。房寬將後軍。忠號驍勇。使將前軍。

遂敗陳暉於白河西。敗景隆於鄭村壩。白清河之戰。忠單騎
突陣。一指中流矢。未暇去鏃。急抽刀斷之。控滿疾驅。殊死戰。
燕王乘高見之。謂左右曰。真壯士也。進攻濟南。克滄州。大戰
東昌夾河。攻彰德。破西水寨。克東阿。東平。汶上。大戰靈璧。遂
從渡淮。入京師。自指揮同知。累遷都督僉事。封永康侯。祿一
千一百石。予世券。忠每戰摧鋒跳盪。為諸將先。而馭軍甚嚴。
所過無擾。善撫降附。得其死力。事繼母以孝聞。夜歸必揖家
廟而後入。儉約恭謹。未嘗有過。成祖北巡。以忠老成。留輔太
子監國。永樂十一年卒。贈蔡國公。諡忠烈。子安嗣。卒。子昌先
卒。昌子錡嗣。弘治中。佩征蠻將軍印。鎮湖廣。平靖州武岡蠻。
卒。子溥嗣。卒。庶兄源嗣。卒。子喬松嗣。卒。子文煒嗣。卒。子應坤

嗣。卒。子錫胤嗣。卒。無子。復封其從父應恒為侯。卒。子錫登嗣。
崇禎末。流賊陷京師。被殺。錫胤妻朱氏。成國公純臣女也。夫
歿。樓居十餘年。不履地。及城陷。捧廟主自焚死。陳旭。全椒人。
父彬。從太祖為指揮僉事。旭嗣官。為會州衛指揮同知。舉城
降燕。從徇灤河。功多。力戰真定。守德州。盛庸兵大至。棄城走。
燕王置不問。從入金川門。封雲陽伯。予世襲。從英國公輔征
交趾。為右叅將。師還。加祿五百石。賚甚厚。已而陳李擴叛。復
從輔往勦。輔還。又命副沐晟。以疾卒於軍。無子。絕封。
趙彝。虹人。洪武時。為燕山右衛百戶。從潁國公征沙漠。城宣
府萬全。懷來。擢永平衛指揮僉事。燕兵至永平。彝與千戶郭
亮。以城降。彝從徐忠等轉戰。亮守永平。時燕王先略旁近地。

既克居庸懷來。山後諸州不守。而永平接山海關障遼東。彝等既附。北平益無他虞。燕王遂南。敗耿炳文軍。炳文罷。李景隆代將攻北平。而遼東鎮將吳高與都督楊文耿璫圍永平。久亮固守不下。燕王置北平而救永平。內外合擊。斬首萬餘。高退保山海關。中讒斥徙。楊文守遼。復攻永平。圍數重。燕王遣劉江赴援。與亮合擊。大敗文昌黎。擒其將王雄等七十一人。自是無窺永平者。燕王稱帝。彝以都指揮使封忻城伯。食祿一千石。世襲。而亮守城功大。由都督僉事封成安侯。世伯。食祿千二百石。永樂八年。彝鎮宣府。常從北征。盜餉下獄。已宥之。尋以呂梁洪湍險。命彝鎮徐州。經理貪縱廢事。復蒙宥罪。宣德初卒。子榮嗣。視前府事。士卒亂行。于謙劾下獄。得釋。

卒。子溥嗣。卒無子。從子瑾嗣。卒。子武嗣。卒。子祖胤嗣。卒。弟祖征嗣。傳子至孫世新。萬曆末卒。子之龍嗣。崇禎末。協守南京。福王立。改督京營。

大清兵下江南。之龍迎降。郭亮。合肥人。永樂中。守開平。貪淫不檢。卒贈興國公。謚忠壯。子晟當嗣伯。仁宗特命嗣侯。宣德五年。扈蹕先歸。下獄失侯。已而復之。卒無子。弟昂乞嗣。予伯。三傳至孫瓚。嘉靖中。僉書前府。至明亡爵絕。

明史藁

列傳第二十九終

Blank columns for the main text of the biography.

明史藁

列傳第三十

光祿大夫 經筵講官明史總裁戶部尚書加七級臣王鴻緒奉
敕編撰

顧成

宋晟

劉榮

鄭亨

盛庸

平安

薛祿

何福

朱榮

郭義

費瓏

譚廣

陳懷

馬亮

蔣貴

孫琬

任禮

趙安

顧成字景韶。其先湘潭人。徙江都。成少魁岸。膂力絕人。善馬。嘗
槩文其身以自異。太祖渡江。來歸為帳前親兵。擎蓋出入。嘗
從上出。舟膠於沙。負舟而行。從攻鎮江。與勇士十人。轉鬪入

城被執。十人皆死。成躍起斷縛。仆持刀者脫歸。導眾攻城。克之。授百戶。大小數十戰皆有功。進堅城衛指揮僉事。洪武四年。從臨江侯入蜀攻羅江。擒偽元帥以下二十餘人。破偽丞相知院兵於漢州。降其城。蜀平。改成都後衛。六年。擒重慶妖賊王元保。八年。調守貴州。時羣蠻叛服不常。成連歲出兵平之。十四年。從潁川侯征雲南為前鋒。首克普定。留成列柵以守。蠻數萬來攻。諸將欲出戰。成不可。俟賊攀柵出奮擊。手殺數十百人。賊眾退。餘賊猶在南門。成斬所俘。而縱其一日。吾夜二鼓來殺汝。夜二鼓吹角鳴礮。賊聞悉走。獲器甲無算。進指揮使。諸蠻隸普定者悉平。十七年。平阿黑螺螄等十餘寨。降尾灑蠻酋。二十一年。討垂西諸蠻。擒關索嶺賊渠。土官阿

宗叛。勢甚張。成連戰斬之。奏革普定府。析其地為州三。長官司六。留治之。大布恩信。諸蠻帖伏。進貴州都指揮同知。平康佐都勻諸蠻。俘斬萬計。二十九年。遷右軍都督僉事。佩征南將軍印。征水西蠻。誅其酋敬德。明年。五開蠻反。率兵破之。勦天柱天堂諸生苗。及西堡平洲諸叛蠻。皆誅其魁。撫綏餘眾。凡所破六洞一百三十七寨。黔由是平。建文元年。為右都督。從耿炳文禦燕師。戰真定。被執。燕王解其縛曰。此天以爾授我也。送北平。輔世子居守。南軍圍城。防禦調度一聽成。城守遂固。燕王即位。論功封鎮遠侯。食祿千五百石。予世券。仍鎮貴州。永樂六年。谷勞王石諸寨蠻作亂。討斬酋暮尙等八百餘。降其黨。十一年。思州宣慰使田琛與辰州知府黃禧連兵。

擅攻思南宣慰使田宗鼎。命成以兵五萬。罄境琛。禧就縛。於是分思州思南地。更置州縣。遂設貴州布政司臺。羅苗作亂。成充總兵官。率二都司三衛兵討之。斬酋普亮。盡殲叛黨。威震百蠻。蠻人爲立生祠。成忠謹。涉書史。始居北平。多效謀畫。終不肯將兵。賜兵器不受。在鎮上書。請早建儲。以正名分。功臣爵賞既定。宜制以禮法。成祖將北巡。召至京。命輔太子監國。頓首言。太子仁明。任付託。廷臣皆材賢。非愚臣所及。請歸備蠻。帝許之。時羣小謀奪嫡。太子不自安。成入辭文華殿。因曰。殿下但當竭誠孝敬。孳孳恤民。萬事在天。宵人不足措意。太子領之。十二年五月卒。年八十有五。贈夏國公。諡武毅。八子長統。普定。衛指揮。以成降。燕被誅。其子興祖嗣侯。興祖討

廣西蠻。先後破藍山賊潘康生。思恩河池賊覃公旺公。新宜山賊韋穩。崇善賊趙暹等。皆平之。他所降附甚衆。然貪恣不法。屢被糾。皆曲宥。會交趾黎利復叛。圍丘溫。興祖擁兵不援。城陷。徵下獄。踰年得釋。正統十四年。自土木遁還。廷臣劾論死也。先逼都城。復冠帶充副總兵。分禦之城外。授都督同知。守備紫荆關。景泰三年。坐受賄。覺復下獄。尋釋。以立東宮恩。予伯爵。天順初。復侯。守備南京。卒。孫淳嗣。卒無子。從弟溥嗣。溥年十三。嗣侯。與諸小侯入國學。用薦。掌五軍右掖。弘治二年。拜平蠻將軍。鎮湖廣。桑植安撫司土官殘虐苗人。奪其印。溥捕首惡。斬之。五年冬。貴州都勻蠻乜富架作亂。自稱都順王。梗滇蜀道。詔溥充行軍總兵官。兵八萬討之。分五路刻期

並進誘誅富架父子。斬首萬計。加太子太保。增祿二百石。人提督團營。兼三千營。掌前軍都督府事。十八年卒。諡襄恪。溥清慎守法。卒之日。囊無餘貲。英國公張懋。出布帛以斂。子仕隆。嗣侯。管神機營。左哨。得士心。正德初。出爲漕運總兵。鎮淮安。十餘年。以清白聞。數請恤軍卒。又請開通惠河。時不能用。及後。開之。人果稱便。武宗南巡。江彬橫甚。折辱諸大吏。惟仕隆不爲屈。嘉靖初。移鎮湖廣。尋召還。提督三千營。加太子太傅。掌中軍都督府事。論奉迎防守功也。錦衣千戶王邦奇。怨大學士楊廷和。兵部尚書彭澤。上疏言哈密失策。事由兩人。帝怒。逮繫廷和諸子壻。給事中楊言疏救。忤旨。事下五府九卿科道議。仕隆言。廷和功在社稷。邦奇小人。假邊事惑聖聽。

傷國體。有詔切責。移病解營務。卒。贈太傅。諡榮靖。子寰。嗣。歷僉中左二府事。守備南京。奉詔讞獄。多所平反。嘉靖十七年。爲漕運總兵官。漕舟以避梓宮。後期者三千。而江南北多災。傷。寰請被災地。停漕運一年。令改折色。軍民交便。又條上漕政七事。並施行。諸爲漕蠹者病之。遂中蜚語。爲給事中王交所劾。已按驗不實。復僉右府。再出鎮淮安。會安南事起。移鎮兩廣。專節制。視便宜。莫宏。漢者。安南都統使。莫福海子也。當襲族人。莫正中。謀殺而篡之。其下弗順。正中逃入中土。時有議乘釁取安南者。寰與提督侍郎周延。決策。送宏。漢還國。安置正中於邊。安南遂定。桂林平樂。徭反。殺縣令。討平之。復鎮淮。有禦後功。入總京營督軍。助諸大工作。加太子太保。復出

督漕。召還請老。隆慶五年。特起授京營總督。尋乞休。神宗嗣位。起掌左府。久之致仕。加少保。萬曆十年卒。贈太傅諡榮僖。自溥至寰三世。皆寬和廉靖。內行飭謹。曉文藝。通賓客。寰父子世爲督漕。善於其職。寰無子。從子承先嗣侯。僉書前府事。亦好文。藏書萬餘卷。已侯猶應科舉試。七試不利。嘗語人曰。吾憑藉國恩。冠蟬圍玉。貴顯矣。然使得列名賢書。吾豈以彼易此。其風尚如此。傳子至孫。肇跡京師。陷爲賊所殺。福王立。贈鎮國公。

宋晟字景陽。定遠人。父朝用。兄國興。並以總管從渡江。攻集慶。國興戰歿。晟嗣其職。朝用以天寧翼元帥請老。晟從鄧愈克徽州。還襲父官。積功授建寧衛千戶。進都指揮同知。歷鎮

江西大同陝西。洪武十二年。坐法降涼州衛指揮使。十七年五月。討西番叛酋。至亦集乃路。擒元海道千戶也先帖木兒。國公吳把都刺赤。平章阿采以下萬八千人。以酋長百五十人送京師。簡精銳千補卒伍。餘悉放遣。召還復爲都指揮。進右軍都督僉事。仍鎮涼州。二十四年。充總兵官。與都督劉真討哈梅里。先是西域諸國來朝貢者。多爲哈梅里王兀納朱里所遏。或邀殺之。帝怒。決計征之。其地去肅州千餘里。晟令軍中多具糧糗。倍道疾馳。奄至城下。金鼓聲震地。闔城股栗。卽日克之。擒其王子列兒怯帖木兒。及僞國公以下三十餘人。收其部落輜重以歸。自是番戎懼服。兵威極西域矣。明年從藍玉征罕東。徇阿真川。土酋哈答等遁去。師還調中軍都

督僉事。二十七年。從總兵官周興。出開原。捕野人。至忽刺江。分三道進。其酋西陽哈遁。追不及。至甫荅迷舊城。俘人畜而還。明年。拜征南右副將軍。討廣西。幘蒙諸寨苗。擒斬七千餘人。又明年。總羽林八衛兵。討平五開龍里十三洞。三十一年。出鎮開平。從燕王出塞。還城。萬全諸衛。建文改元。仍鎮甘肅。成祖卽位入朝。擢後軍左都督。拜平羌將軍。遣還鎮。三年。招降把都帖木兒。倫篤兒灰等。部落五千人。獲馬駝牛羊萬六千。封西寧侯。祿千一百石。世指揮使。晟凡四鎮涼州。前後二十餘年。威信著絕域。帝以晟舊臣。有大將材。專任以邊事。所奏請輒報可。御史劾晟自專。帝曰。任人不專。則不能成功。况大將統制一邊。寧能盡拘文法。卽敕晟以便宜從事。晟嘗請

入朝。報曰。西北邊務。一以委卿。非召命毋輒來。尋命營河西牧地。及圖出塞方略。會病卒。晟三子長瑄。建文中。爲府軍右衛指揮使。禦燕師有功。戰靈璧。先登。斬數級。諸軍皆敗。力鬪死。瑄子晟長孫。成祖惡之。不得嗣。瑄弟琥。尙安成公王。得嗣。侯。予世券。八年。佩前將軍印。鎮甘肅。諭曰。毋替父功。琥嘗擅留番酋。詔切責。十年。與李彬捕叛酋老的罕。俘斬甚衆。召還。洪熙元年。坐不敬奪爵。并削駙馬都尉官。宣德中。復都尉。琥旣廢。以弟瑛嗣。瑛尙咸寧公主。嘗求白河墀地。有司言地連民田。不與。正統中。歷掌左軍前府事。十四年七月。也先大舉入寇。命瑛充總兵官。督鎮守大同。朱冕石亨等禦之。時中官郭敬監軍。諸將皆受制。戰陽和。全軍沒。敬伏草間免。瑛及冕

皆死。贈鄆國公。諡忠順。子傑嗣。景泰中。典禁兵宿衛。以勤慎稱。卒。子誠嗣。誠少材武。常往涼州視別堡。寇掠牛馬北去。誠方獵。遇之。三矢殪三人。寇大驚散走。盡驅所掠還。嗣侯署右府事。復佩平羌將軍印。鎮甘肅。邊備修飭。西陲宴然。卒。弟讓嗣。卒。子愷嗣。弘治中。領將軍宿衛。正德中。協守南京。以不稱召還。侯四十七年卒。子良臣嗣。典五軍營。嘉靖初。領宿衛。被劾罷。卒。子天馴嗣。僉書後府。董操江。掌南後府。協守南京。召還。掌後府。未至。遇盜香河。溺死。子公度嗣。數日卒。四傳至曾孫裕德。死。流寇難。福王時。贈寧國公。祔祀忠臣廟。

劉榮。宿遷人。初冒父名江。從魏國公。戰灰山黑松林。爲總旗。給事燕邸。姿貌豐偉。驍勇多智略。王深器之。授密雲衛百戶。

從起兵爲前鋒。屢立戰功。徇山東。與朱榮率精騎三千。夜襲南軍於滑口。斬數千人。獲馬三千。擒都指揮唐禮等。累授都指揮僉事。戰滹沱河。奪浮橋。掠館陶。曹州大獲。還軍備北平。敗平安於平村。楊文以遼東兵圍永平。江在援。文引却。江聲言還北平。徐行二十餘里。卷甲囊旗。夜入永平。文聞江去。復來攻。江突出掩擊。大敗之。斬首數千。擒指揮王雄等七十一人。遷都指揮使。次淝河。江與白義王真等。以輕騎致敵敗之。時南軍駐宿州。積糧爲持久計。王患之。議絕其餉道。命江將三千人往。趨起不行。王大怒。欲斬之。諸將叩頭請乃免。渡江策功。以前故。止授都督僉事。遷右都督。永樂八年。從北征。以遊擊將軍督前哨。次金剛阜。據山頂泉。已敗敵。斡難河。復敗。

阿魯合於靜鹵鎮。師還殿。卽軍中進左都督。遣鎮遼東。寇闌入殺官軍。帝怒命斬江。旣而宥之。再從北征。仍爲前鋒。先往興和。將勁騎游徼。車駕駐至喜川。命偵敵於飲馬河。見敵騎東。追至康哈里孩。擊斬數十人。復與大軍合。擊馬哈木於忽失温。下馬持短兵。突陣斬獲多。受上賞。復充總兵官。鎮遼東。倭數寇海上。北抵遼。南訖浙閩。瀕海郡邑多被害。江度形勢。請於金線島西北望海塌築城堡。設烽埃。嚴兵待賊。十七年六月。瞭者言。東南海島中舉火。江急引兵趨塌。倭數千人。駕三十餘舟至。泊馬雄島。躍岍闌塌。江依山設伏。別遣將斷其歸路。以步卒迎戰。佯誘賊入伏。礮舉伏起。自辰至酉。大破賊。賊走櫻桃園空堡中。江開西壁縱之走。復分兩路夾擊。盡覆。

之。斬首千餘級。生擒百三十人。自是倭大創。不敢復入遼東。召封廣寧伯。祿千二百石。予世券。始更名榮。尋復遣之鎮。踰年卒。榮爲將。常爲軍鋒。前無堅陣。馭士有紀律。恩信嚴明。諸款塞者。撫輯備至。贈侯諡忠武。子湍嗣。卒無子。二弟淮安。淮先卒。子瓘幼。榮妻慮安有他意。匿瓘不以聞。安得嗣。正統十四年。充總兵官。與郭登鎮大同也。先擁英宗抵城下。邀登出見。登不可。安出見。伏哭於前。厚有所獻。景帝降敕。切責而安馳至京師。言上皇使已來告敵情。進已爲侯。羣臣交劾。下獄論死。會京師戒嚴。釋安仍爲總兵。陣東直門。寇退。進都督同知。守備白羊口。復伯爵。英宗復位。予世侯。命理右府。總神機營。再益祿三百石。曹欽反。安被劾。加太子少傅。成化中卒。贈。

嶧國公諡忠僖。時瓘已長，遂與安子璇爭襲，詔瓘襲伯爵，而授璇錦衣千戶。瓘卒無子，仍以璇嗣。歷掌神機効勇營。卒子信嗣，累掌前府。卒子泰嗣，出督操江。還提督團營，歷總三千練武神機五十四營兵。世宗南巡，掌中府居守。卒諡康順。子允中嗣，僉書後府，領宿衛。卒子嗣德嗣，卒無子，復封其從父允正為伯，又再傳而明亡。

鄭亨，合肥人。父用，從太祖於和，積功為大興左衛副千戶。請老，亨嗣職。洪武二十五年，應募持檄諭鞑靼，至幹難河，還遷密雲衛指揮僉事。燕師起，以所部降，攻真定，先登。進指揮使，師襲大寧，至劉家口，將勁騎數百，卷旆登山，潛出關後，斷其歸路，攻之，悉縛守關者，遂奄至大寧，克之。進北平都指揮僉

事。夜率眾破鄭村壩兵，西破紫荆關，掠廣昌，取蔚州，直抵大同。還戰白溝河，陷陣大捷，逐北至濟南。進都指揮同知，攻滄州，軍北門，扼餉道。東昌戰敗，收散卒軍深州。明年，戰夾河，藁城略地，至彰德。耀兵河上，還屯完。明年，從破東平，汶上軍。小河戰，敗王真，死。諸將皆欲北還，惟亨與朱能不可。入京師，遷都督僉事。進左都督，封武安侯，祿千五百石。予世券，留守北京。時用猶在，受封爵視亨。永樂元年，充總兵官，率兩將軍備宣府。時元遺兵出沒塞下，亨受敕備邊。度宣府萬全懷來形便，每數堡相距，擇一堡為高城深池，城多置門，浚井蓄水，其中度可容數堡士馬者，謹斥堠，遠瞭望。寇至，夜舉火，晝鳴礮，并力堅守。規畫周詳，後莫能易。三年，召還，旋遣之鎮。七年秋，

備開平。帝北征，命亨督運出塞，將右哨。從追敗本雅失里。大軍與阿魯台遇，亨率衆先，遂大破之。論功爲諸將冠。仍出鎮宣府。復從北征，將中軍，戰於忽失溫，追敵中流矢。却復與大軍合破之。復從出塞，將左哨，發卒萬人，治龍門道過軍，破兀良哈於屈裂河。將輜重還，擊破寇之追躡者，仍守開平。比年大軍再出，亨皆將左哨。成祖凡五出塞，亨皆在行。仁宗卽位，拜征西前將軍，鎮大同，墾田積穀，邊備繕完。自是大同希寇患。宣德元年，召掌北京行後府，已仍鎮大同。轉餉宣府，招降酋長四十九人，請於朝厚撫之。歸附者相屬。九年卒。亨嚴肅重厚，善撫士，耻掎克。在大同時，鎮守中官撓軍政，亨據理裁正，其人不悅，然其卒也，深悼惜之。贈漳國公，諡忠毅。妾張自

經以殉。贈淑人。子能嗣。督操五軍營，坐事謫塞上。召復爵。卒。子宏嗣。成化初，佩征虜前將軍印，鎮遼東。宇來諸部入掠，敗之長嶺山，又敗之遼河。尋掌南後府，提督操江。卒。子英嗣。弘治末，充總兵官，鎮陝西，頗有禦寇功。爲楊一清劾罷，傳爵至國亡乃絕。

盛庸，不知何許人。洪武中，累官至都督同知。女爲汝南王有勲妃。建文初，以參將從耿炳文北伐。炳文召還，李景隆代之。遂隸景隆麾下。二年，景隆爲燕敗，棄師遁。庸入濟南，與鐵鉉等禦燕。大挫燕衆。燕王解圍去，封歷城侯，食祿千石。尋命爲平燕將軍，總兵官。陳暉平安爲左右副總兵。馬溥、徐真爲左右參將。鐵鉉參贊軍務，督諸軍北進。時吳傑平安守定州，庸

守德州。徐凱城滄州為犄角。燕王乘凱未備，直趨滄州，破擒之。掠其輜重，還北平。道經德州，庸遣輕騎躡其後。王率數十騎為殿，擊降庸兵。已而轉略東昌。庸背城陣，燕兵直前薄。左翼不動，復衝中堅。庸開壁縱王入，圍之數重。會燕將朱能等率番騎薄東北角。王乘間突圍出，而燕軍為火器所乘。却庸兵奮擊，斬燕大將張玉。王獨以百騎殿，退至館陶。庸檄真定、滄德兵遮燕歸路。燕精銳喪失幾盡。王遂還北平。明年，燕王復出保定，庸營夾河。王以三騎來覘，掠其陣而過。庸遣千騎追襲。為王射却。王令步卒先攻，庸軍擁盾自蔽，乃以鐵積鈎之。騎兵乘間馳入，庸麾軍力戰。燕將譚淵塵死，而未能。張武等率眾並進。王以勁騎貫陣，與能合勢。庸部驍將皂旗張等

亦俱殲焉。會日暮，斂兵。燕王以數十騎逼庸營野宿。天明引馬鳴角穿營而去。明日復戰，燕軍東北，庸軍西南。自辰至未，互勝負。兩軍皆疲，將士各坐息。復起戰，忽東北風大發，飛塵蔽天。庸軍士面迎砂礫，不辨物。燕兵乘風大呼，左右橫擊，斬首數萬。庸大敗，走德州。先是庸出夾河，約吳傑、平安等出真定攻北平。將至，庸敗聞，遂還。及靈壁敗，安等被執，庸獨列戰艦淮南岸拒燕。而燕將丘福等潛濟出，庸後庸不能軍。燕王獲戰艦渡淮，從盱眙出揚州。將謀渡江，都督陳瑄率舟師迎燕。燕王乘瑄舟徑渡。庸倉卒聚海艘出高資港迎戰，不勝軍潰散。嗣是不復有拒燕者矣。燕王稱帝，庸尚擁兵淮上。乃賜勅曰：比以山東未定，命卿鎮守淮安。今鐵鉉就獲，諸郡悉平。

朕念山東久困兵革。憊於轉輸。卿宜輯兵養民。以稱朕意。永樂元年致仕。無何。千戶王欽。訐庸罪狀。欽立進指揮同知。都御史陳瑛。因劾庸。怨望有異圖。庸遂自殺。

平安。滁人。父定。從太祖起兵。官濟寧指揮僉事。從常遇春至元都。戰歿。安初與周舍道舍馬兒。金剛奴也。先買驢。真童潑兒。皆爲太祖義兒。定歿。安襲定職。遷密雲指揮使。進右軍都督僉事。力舉數百斤。果勇善戰。建文元年。從李景隆北伐。爲先鋒。燕王將渡白溝河。安率萬騎邀之。燕王曰。平安豎子。往從出塞。識我用兵。敢爲先鋒。今當先破之。使敵喪膽。及戰。不能挫安。時南軍六十萬。列陣以待。王率將士馳入陣。戰至暝。互有殺傷。乃各斂軍。而燕王夜走。失道。從者僅三騎。下馬伏。

視河流。辨東西。始知營壘所在。明日再戰。安擊敗燕將房寬。陳亨。燕王見陣後塵起。率七騎馳赴。遇敵二萬。左右止。王勿前。王曰。敵精銳所在。吾獨當之。使諸將得致力於彼。於是進戰不已。馬創矢竭。劍折不可擊。而敵衆益逼。燕王乃佯登堤。招後以疑敵。遂相持。當是時。南軍諸將。安戰最力。王亦幾危。已而敗。語詳景隆傳。燕兵圍濟南。安謀出御河。奪燕餉舟。圍乃解。明年。燕敗盛庸於夾河。乘勢廻軍。與安戰單家橋。安奮擊大破之。擒其將薛祿。無何逸去。再戰滹沱河。又破之。安於陣中。縛樓高數丈。戰酣。輒升高望。發強弩射燕軍。矢集燕王旗如蝟毛。忽大風起。發屋拔樹聲如雷。都指揮鄧馘。陳鵬等陷敵中。安遂敗入真定。燕王數出搏戰。所向皆靡。安與庸二。

軍屢挫之。王不得逞。踰月。燕師出大名。安不急迎戰。而與唐及吳傑等分兵。擾其餉道。燕王苦之。遣指揮武勝奉書於朝。請撤安等息兵。帝覽書頗惑之。而燕將李遠等方潛走沛縣。焚糧舟。掠彰德。破尾尖寨。諭降林縣。勢且南下。安於是率萬騎直走北平。至平村。去城五十里。而軍。燕王懼。遣劉江等馳救。安亦引還。與燕將李彬戰。楊村敗之。燕兵破蕭。安統大軍躡燕師後。燕將白義王真。劉江迎敵。安斬其將王真。真敢戰。燕王常曰。奮勇如王真。何事不成。至是爲安所殺。燕王乃身自迎戰。安部將火耳灰。挺鎗大呼。直前刺王。馬忽蹶。反被擒。旣安軍尾。燕師至小河。張左右翼以進。合戰。斬燕將陳文。於是安移軍齊眉山。復進搏戰。自午至酉。又敗之。燕諸將請還。

軍圖後舉。王大怒。諸將不敢復言。而何福又引軍來與安合。燕軍益大懼。燕王晝夜擐甲。福欲持久。老燕師移營靈壁。深塹高壘。自固。而運糧實其中。會糧乏。安分兵迎糧。燕王以精騎遮之。軍分爲二。福開壁。援爲高煦所敗。將移軍淮河就糧。燕軍猝薄其壘。軍中大亂。人馬墜壕塹俱滿。福單騎走。安及陳暉馬溥。徐真。孫成等三十七人皆被執。文臣宦官在軍被執者百五十餘人。燕軍旣得安。懽呼動地曰。吾屬自此獲安矣。安屢敗燕兵。斬驍將數人。燕軍莫敢嬰其鋒。至是爭請殺之。燕王惜其勇。簡銳卒衛送北平。命世子及郭資等善視之。王卽帝位。以安爲北平都指揮使。尋進行後府都督僉事。永樂七年。帝巡北京。將至。謂左右曰。平保兒尙在耶。保兒安小。

字也。安聞之自殺。命以指揮使祿給其子。

薛祿膠人行六軍中呼曰薛六。既貴乃更名祿。祿起卒伍。從燕起兵。首奪九門。真定之戰。左副將軍李堅迎關。鋒始交。祿持槊刺堅。墜馬擒之。擢指揮僉事。從援永平。下大寧。富峪。會州寬河。還救北平。先驅敗南軍游騎。進指揮同知。攻大同。為前徼。大獲。鑿白溝河。追奔至濟南。遷指揮使。大戰東昌。以五十騎前敗南兵數百。南兵悉眾來追。復大敗之。獲馬二百三十。時燕軍為盛。庸敗。還走北平。庸伏兵威縣深州。以待祿。皆擊走之。戰滹沱河。右軍力屈。祿馳赴敵陣。出入數十戰。破走之。追奔至夾河。斬馘無算。戰單家橋。馬蹶被執。奮脫縛。拔刀斬守卒數人。馳還復戰。大敗平安軍。掠定順德。大名彰德。攻

西水寨。生擒都指揮花英。乘勝下東阿。東平汶上。連戰淝河。大店。小河。汴隄。靈璧。功最。入京師。論功。擢都督僉事。永樂六年。進同知。八年。從北征。至斡難河。以功。進右都督。上言。自古用人。必資豫教。今武臣子弟。閒暇不教。恐緩急無可使者。帝聽其言。會四方送幼軍數萬至。悉隸祿操習之。十二年。復從北征。還。董建北京宮殿。十八年。役竣。封陽武侯。祿千一百石。二十一年。復從北征。還。討平長興盜。仁宗即位。命掌左軍。加太子太保。予世券。洪熙元年。命巡北邊。破敵於大松嶺。益祿五百石。宣宗初。佩鎮朔大將軍印。復巡邊。還。陳備邊六事。從征樂安。為前鋒。先二日圍其城。高煦擒。留祿鎮撫。二年夏。復佩大將軍印。督輸開平。還軍宣府。寇薄開平。無所得而退。祿

謀寇去城三百餘里。率精兵晝伏夜行。三夕至。縱輕騎蹂敵營破之。大獲人畜。師還。敵躡其後。復奮擊敗之。寇由是遠遁。三年。從北征。破敵於寬河。畱鎮薊州永平。巡邊護餉。數出開平宣府間。五年。遇敵於鳳凰嶺。斬獲多。加太保。建言永寧衛團山及鷓鴣赤城雲州獨石無城堡不可守。築之便。於是發卒二萬六千赴役。精騎五百護之。祿與豐城侯董築臨行賜詩。以山甫南仲爲比。疾作召還卒。贈鄴國公。諡忠武。祿有勇而好謀。謀定後戰。戰必勝。紀律嚴切。秋毫無犯。善撫士卒。同甘苦。人樂爲用。靖難諸功臣。張玉朱能及祿。三人爲最。而祿逮事三朝。歷鎮邊關。歸然爲時宿將。子勳先卒。孫詵嗣。命掌前府。三傳至曾孫翰。典五軍大營。領宿衛。卒無子。族人爭襲。

者久之。不得請田宅。並入官。世絕者三十餘年。萬曆五年。乃復封翰族子銀爲侯。無子。弟鈺嗣。卒子濂嗣。崇禎末。京師陷。被害。

何福。鳳陽人。洪武初。累戰功。爲金吾後衛指揮同知。從傅友德征雲南有功。來獻捷。擢都督僉事。從藍玉出塞。至捕魚兒海。俘獲萬計。二十二年。江陰侯吳高部降卒南征。抵沅江而叛。由思州出荊州。道渭河。欲遁沙漠。福與都督聶緯追擊。及諸鄜延盡殲之。移兵討平都勻蠻。俘斬萬計。二十四年。拜平羌將軍。討越州叛蠻阿資。破降之。擇地立柵處其衆。置寧越堡而還。遂平九名九姓諸蠻兵。都督茅鼎會兵徇五開。未行。而畢節囉囉諸蠻叛。大掠屯堡。殺吏士。福令畢節諸衛嚴兵。

而檄都督陶文等從隄直擣其巢擒叛酋僂之分兵捕諸蠻建堡設戍乃趨五開請因兵力討奢香不許三十年會顧成平水西蠻拜征虜左將軍副西平侯討平緬叛酋刀幹孟躋高黎共山直擣南甸破擒其酋刀名孟回軍擊景罕寨不下西平侯以大軍至幹孟懼乞降已而西平侯卒幹孟竟不降復拜福征虜將軍縣軍往討擒幹孟以歸降其衆七萬遂分兵徇諸山寨克孟別降蒲蠻殲哈喇老姚破枯阿莽撫要甸乃班師百蠻悉定拓地訖於洱海福功爲多建文元年還京師進都督同知練兵德州進左都督與盛庸平安會兵禦燕師戰淮南北不利奔還成祖卽位以福宿將知兵推誠用之聘其甥女徐爲趙王妃尋命仍佩征虜將軍印充總兵官鎮

寧夏節制山陝河南諸軍福至鎮宣布德意招徠遠人塞外諸部降者相踵邊陲無事因請屯田積穀定賞罰爲經久計帝嘉之數降詔褒慰永樂四年備靈州尋移鎮甘肅福馭軍嚴下多不便者帝間使使戒福善自衛毋爲小人所中福請出京師宿將將降人帝報曰爾久總蕃漢恐勢重致讒耳爾老將朕推誠倚任毋顧慮於是福議出兵遮賀蘭山訶寇情又請以布市馬選其良者別爲羣馬大蕃息永昌苑牧馬自此始遂遣都指揮劉廣等出塞邀擊亦集乃時本雅失里糾阿魯台入寇已而爲瓦剌所敗走臚胸河欲收諸部潰卒窺河西詔福嚴兵待而迤北王子國公司徒而下大酋以十數率所部駐亦集乃乞內附福以聞帝令庶子楊榮往佐福撫

之其衆悉降。帝嘉福功，命榮卽軍中封福爲寧遠侯，祿千石。八年，帝北征，召福從出塞。初，帝以福有才略，寵任踰諸將，有請輒聽。福亦善引嫌，有事未嘗專決。帝以此益重福，比爲通侯。志凌驕，軍中數違節度，羣臣有言其罪者，帝猶曲意容之。福快快有怨言。師還，都御史陳瑛劾福，福懼自縊死。爵除而趙王妃亦尋廢。

朱榮字仲華，沂人。洪武十四年，以總旗從西平侯征雲南，以功遷百戶。征金山至一迷河，哈刺哈進，副千戶守大寧。靖難兵至，降授指揮僉事，俾佐左軍。大小二十餘戰，論功授都督僉事。永樂四年，從新城侯張輔征交趾，破鷄陵關，會沐晟於白鶴。輔等議於嘉陵江上流濟師，乃遣榮陳下流十八里，日

增其數以惑賊。又作舟筏爲欲濟狀牽制之。賊果分兵渡江登岫，榮等奮擊大破之。大軍遂進克多邦城，榮功爲多。然帝以榮嘗怠事，師還論功，僅擢右都督，賜白金鈔幣。七年，復從輔討賊餘黨平之。明年，從征阿魯台，與劉江並進左都督。十二年，復從北征，與江俱爲前鋒，破馬哈木。其冬充總兵官鎮大同，修忙牛嶺兔毛河赤山榆楊口來勝諸城，寇不敢近。居三年，召還。十八年，代劉榮鎮遼東。二十年，復從北征爲前鋒，駐鷓鴣訶寇，以五千騎視寇所向。大軍次玉沙泉，榮率銳士三百人，人三馬，齎二十日糧，深入訶寇。寇已棄牛羊馬駝輜重北走，榮悉收之，焚其輜重，移師破兀良哈。師還，封武進伯，祿千二百石。仍鎮遼東。二十二年，復從北征，已還鎮。洪熙元

年佩征虜前將軍印鎮如故尋卒於軍贈侯諡忠靖子冕嗣掌左府練神機營兵宣德初改右府尋以晉王濟熿新廢命鎮山西還治府事六年命輸餉獨石因巡其地正統四年佩征西將軍印克總兵官鎮大同九年出塞捕寇十四年北征戰於陽和死之諡忠愨子瑛嗣天順元年充總兵官鎮廣西以疾徵還兵部發其在鎮不法狀命俟疾已治之會卒黜其卹典子雲嗣卒無子弟霖嗣領三千營卒子絜嗣再典營務領宿衛卒子本嗣董操神機營出視牧馬以疾乞還卒無子以從父江紹封卒弟海嗣領宿衛卒子承勲嗣僉書中府隆慶初坐事罷已復遷右府明亡乃絕永樂中諸徹侯不以靖難功封者宋晟征西劉榮捕倭薛祿何福郭義金玉及榮皆

以征北義濟寧人事太祖累功爲燕山百戶從燕王北征進千戶從起兵定京師累遷左都督數從出塞有功與薛祿同日封安陽侯祿千一百石命下而疾革遂卒玉江浦人襲父官爲燕山護衛百戶從起兵有功累遷河南都指揮使進都督僉事永樂八年從北征克鷹揚將軍破阿魯台師旋爲殿至長秀川敵所棄牛羊雜畜亘數十里悉驅以歸焚其輜重十四年討平妖賊劉子進追論出塞功與郭義同日封惠安伯祿九百石明年卒

費瓚定遠人祖愚洪武時燕山中護衛指揮使傳子肅至瓚從燕王起兵有功累進後軍都督僉事永樂八年春涼州衛千戶虎保永昌衛千戶亦令真巴等叛衆數千屯據驛路新

功進都督僉事。仁宗嗣位，擢左都督，鎮宣府。宣德六年，戶部請令他衛軍調戍宣府者，悉遣還屯種。帝可之。廣上言：臣所守邊，一千四百餘里，敵人窺伺，竊發無時。脫有警，徵兵數百里外，勢豈能及。屯種之議，臣愚未見其可。帝以邊卒戍守有餘，但命永樂中調者勿遣。正統初，朝議以脫歡雖款塞，狡謀未可測，命廣及他鎮總兵官陳懷、李謙、王彧、圖上方畧。廣等各上議，大要謂邊寇出沒不常，惟守禦爲上策。宜分兵扼要害，而間遣精銳巡塞外。遇敵則量力戰守，間諜以偵之。輕兵以躡之。寇來無所得，去有所懼，則邊患可少弭。帝納其言。六年冬，以守邊勞，封永寧伯，祿千二百石。仍鎮宣府。又三年卒。謚襄毅。廣長身多力，奮迹行伍，至大將。大小百餘戰，未嘗挫。

劒。初統神機營，馬獨肥，時號譚家馬。在宣府二十年，撫士卒有恩，邊徼帖然。稱名將。嘗逞憤杖殺都司經歷，又以私憾杖百戶，並爲言官所劾，以廣有將才，置不問。既卒，子序屢請襲爵。吏部言非世券，命爲指揮使。

陳懷，合肥人，襲父職爲真定副千戶。永樂初，積功至都指揮僉事。從平安南，進都指揮使。涖山西都司事。再從張輔擒安南賊渠簡定。從都督費瓛征涼州叛人虎保，皆有功。尋充參將鎮寧夏。仁宗立，進都督同知。宣德元年，代梁銘爲總兵官。時官軍征交趾者屢敗，詔發松潘軍援之。將士憚行，千戶錢宏與衆謀，詐言番叛，率兵掠麥，匪諸族番人震恐，反殺指揮陳傑等，陷松潘、疊溪、圍威茂諸州。指揮吳玉、韓整、高隆相繼。

敗績。西鄙騷然。詔遣鴻臚丞何敏指揮吳瑋往招之。而命懷統劉昭趙安蔣貴師數萬隨其後。瑋等至。賊不順命。瑋遂與龍州知州薛繼賢擊賊。復松潘。比懷至。仍屬瑋前鋒。遂復疊溪。降二十餘寨。懷又招撫復業。萬二千二百餘戶。歸所掠軍民二千二百餘人。西鄙遂定。進懷左都督。厚賚金幣。而絀瑋功不錄。懷留鎮四川。在鎮驕縱不法。干預民事。受賕庇罪人。侵奪屯田。笞辱僉事柴震等。數爲言官所劾。帝降勅責讓。復以御史王禮彈章示之。懷引罪。遂置不問。六年。松潘勒都北定諸族。暨空郎龍溪諸寨番復叛。懷遣兵戰敗。指揮安寧等死者三百餘人。懷乃親督兵深入。破革兒骨寨。進攻空郎乞兒洞。賊敗斬首。墜崖死者無算。革兒骨賊復聚。生苗四百餘。

設伏邀擊。都指揮趙諒覺之。勦戮殆盡。於是任昌牛心諸寨番聞風乞降。羣寇悉平。久之。巡按御史及按察使復奏。懷僭侈踰分。每旦令三司官分班侍立。有事跪白。懷中坐稱旨行遣。且日荒於酒。不飭邊備。致城寨失陷。宣宗怒。召懷還。命文武大臣鞠之。罪當斬。下都察院獄。宥死落職。正統二年。以原官鎮大同。時漠北人進貢者。日給廩餼。爲軍民害。懷言於朝。得減省。居二年。以年老召還。命理中府事。九年春。與中官但住。出古北口。征兀良哈還。與馬亮等同封。而懷得平鄉伯。十四年。扈駕北征。死於土木。贈侯諡忠毅。子輔乞襲爵。吏部言非世券。執不許。景帝以懷死事。特許之。輔卒。子政請襲。吏部執如初。中旨允之。政鎮兩廣久。自陳軍功。乞世券。吏部復執。

不可。詔許子信襲弘治中。信卒無子。弟俊嗣指揮使。馬亮。淇人。起行伍。從燕師靖難。累功至都指揮僉事。宣宗時。四遷至左都督。兀良哈之役。偕中官劉永誠。出劉家口。至黑山大松林。流沙河諸處。遇賊勝之。還封招遠伯。是役也。中官王振主之。故諸將首功少。率得封。廷臣莫敢爭。為伯三年卒。諡榮毅。亮勇悍善騎射。每戰身先士卒。所向克捷。時稱驍將。

蔣貴字大富。江都人。以燕山衛卒。從燕王起兵。積功至昌國衛指揮同知。從大軍征交趾。及沙漠。遷都指揮僉事。掌彭城衛事。宣德二年。四川松潘諸番叛。充右參將。從總兵官陳懷討之。募鄉導。絕險而進。薄其巢。一日十數戰。大敗之。進都指揮同知。鎮守密雲。七年。復命為參將。佐懷鎮松潘。明年。進都

督僉事。充副總兵。協方政鎮守。又明年。諸番復叛。政等分道進討。貴督兵四千。攻破任昌大寨。會都指揮趙得官。聚兵以次討平龍溪等三十七寨。斬首一千七百級。投崖墜水死者無算。捷聞。進都督同知。充總兵官。佩平蠻將軍印。代政鎮守其地。正統初。召還為右都督。會阿台寇甘涼。邊將告急。命佩平虜將軍印。移師討之。賊犯莊浪。都指揮江源戰死。亾士卒百四十人。侍郎徐晞劾貴。朝議以貴方選軍甘州。勢不相及。而莊浪正晞所統。責晞委罪。置貴不問。明年春。謀報寇。駐賀蘭山後。詔貴與都督趙安出塞。貴至魚兒海子。用安敬言。以前途無水草。引還。都御史羅亨信言狀。尚書王驥出視師。斬敬。責貴立功。貴益奮。破敵狼山之捷。窮追抵石城泉。斬首二

百餘級盡獲其馬駝衣械阿台驚遁已而謀知敵巢將精騎二千五百人爲前鋒深入副將李安沮之貴拔劍厲聲叱安曰敢阻軍者死遂出鎮夷關疾馳三日夜至兀魯乃阿台方牧馬貴猝入馬羣令諸軍以鞭擊弓韉驚馬馬盡佚敵旣失馬乃挽弓步鬪貴縱騎蹂擊大敗之復分軍爲兩翼別遣百騎乘高爲疑兵旣遇賊轉戰百餘里朶兒只伯以數騎遁走西邊悉平封定西伯食祿一千二百石給世券四年代任禮鎮甘肅六年命充總兵官佩平蠻將軍印征麓川蠻思任發與王驥帥師抵金齒分三路進搗上江寨破木籠山七寨及馬鞍山象陣功皆第一師還帝親慰勞御奉天門論功進封定西侯食祿一千五百石八年復與驥討思機發緬人聲言

送賊貴密焚其舟大戰一晝夜盡俘其妻孥象馬破壘二百。熨寇遂平。師還。賞賚甚渥。加歲祿五百石。是役也。貴子雄乘敵敗。率三十人追深入。敵扼其後。自勿沉於江。贈懷遠將軍。彭城衛指揮使。十四年。貴卒。年七十。贈涇國公。諡武勇。貴起卒伍。不識字。天性朴實。忘已下人。能與士卒同甘苦。出境討賊。衣糧器械。常身自囊負。不役一人。臨陣輒身先之。以故所向有功。子義病不能嗣。以義子琬嗣侯。天順末。佩平羌將軍印。總兵甘肅。築甘州沙河諸屯堡。成化八年。召還。協守南京。兼督操江。十年。入督十二團營。十二年。兼總神機營兵。上言。太祖肇建南京。京城外復築土城。以衛居民。誠萬世之業。今北京但有內城。已巳之變。敵騎長驅直薄城下。可以爲鑒。今

西北隅。故址猶存。亟行勸募之令。濟以工罰。成功不難。又言。大同宣府諸塞下腴田。無慮數十萬。悉爲豪右所占。畿內八府良田。半屬勢要家。細民失業。脫使邊關有警。內郡何資。運道或梗。京師安給。請遣給事御史。按覈塞下田。定其科額。畿內民田。嚴戢豪右。毋得侵奪。庶兵民足食。而內外有備。章下所司。雖不盡行。時論趨之。十三年。帥京軍。防秋大同宣府。陳機宜十餘事。皆報可。十五年。偕汪直。按遼東邊事。二十年。佩將軍印。出禦邊寇。寇退。班師。累加至太保。兼太子太傅。卒。贈涼國公。諡敏毅。子驥嗣。典京營兵。弘治中。充總兵。歷鎮薊州。遼東。湖廣。官中外二十年。家無餘貲。正德初。再傳至孫傳。嘉靖中。累典軍府。佩征蠻將軍印。鎮兩廣。以平海賊及慶遠。猗

功。加太子太保。明亡爵絕。

任禮字尙義。臨漳人。以燕山衛卒。從成祖起兵。積功至山東都指揮使。永樂二十年。擢都督僉事。從北征。前行偵敵。還受厚資。仁宗卽位。簡掌廣西都司事。尋改遼東。宣宗立。進都指揮同知。從平漢庶人。又從征兀良哈。還爲後拒。英宗立。進左都督。正統元年。佩平羌將軍印。克左副總兵。鎮甘肅。阿台朶爾只伯。數犯肅州。璽書譙讓。已復入犯。禮督軍禦之。俘斬百餘人。尋與蔣貴等。出塞並無功。三年。以總兵官。從王驥破阿台。至黑泉。斬獲多。封寧遠伯。食祿千二百石。明年。還朝。又明年。代貴鎮甘肅。八年。赤斤蒙古衛都督。且旺失加苦也。先暴橫。欲移駐也洛卜刺。禮以其地近肅州。執不許。已奏請建寺。

於其地。禮復言。許其建寺。彼必移居。遺後患。事竟寢。時邊將家僮墾塞上田者。每頃輸糧十二石。禮請於朝。減二石。再請輕之。復減如前數。當是時。邊塞無警。禮與巡撫曹翼輩屯田積粟。繕甲訓兵。邊備甚固。十一年。沙州衛都督喃哥兄弟爭部眾。離貳。禮欲乘其饑窘。遷之內地。會喃哥亦請居肅州境內。禮因遣都指揮毛哈刺往撫其眾。而親率軍兵繼其後。比至。喃哥復持兩端。其部下欲奔瓦刺。禮進兵逼之。遂收其全部千二百餘人。以還。事聞。英宗大喜。賜賚甚厚。時也先方盛。封喃哥弟鎖南奔爲祁王。禮以二寇合。則勢益難制。遣人招之。鎖南奔欲從未決。禮潛師直抵罕東。繫之以歸。遂賜禮鐵券。令世襲。十四年也。先分道入寇。抵肅州。禮遣裨將禦之。再

戰再敗。失士馬萬計。徵還。以伯就第。景泰初。起督三千營。以老致仕。久之復起。守備南京。入掌中府。禮自起。卒伍至大將。恪謹奉法。成化初卒。贈侯。諡僖武。子壽嗣。總兵鎮陝西。坐征滿四失律。論死。宥戍邊。卒。子弘乞嗣。不許。與世指揮使。趙安。狄道人。從兄琦。土指揮同知。坐罪死。安謫戍甘州。永樂元年。進馬除臨洮百戶。使西域。從北征立功。進都指揮同知。宣德二年。松潘番叛。充左參將。從總兵陳懷討平之。進都督僉事。四年。使烏思藏。明年復以左參將。從史昭討曲先。斬獲多。九年。中官宋成等。使烏思藏。命安率兵千五百人。送之畢。力木江。尋與侍郎徐晞出塞。討阿台。敗之。鎮番。正統元年。進都督同知。充右副總兵。協任禮鎮甘肅。明年。與蔣貴出塞。勦

賊無功。其冬，與王驥任禮蔣貴，分道進師。安至刁力溝，繫首乃顏忽。及奄克台等，封會川伯，食祿千石。安家臨洮，姻黨廝養少為盜，為副使陳斌所奏。在京州，又多招無賴為僮奴，擾民。復為御史孫毓按劾，詔皆不問。安勇敢有將略，與貴禮並稱西邊良將。九年卒。子英為指揮使，立功進都督同知。卒。子鉉嗣官。

明史藁

列傳第三十終

明史藁

列傳第三十一

光祿大夫 經筵講官明史總裁戶部尚書加七級臣王鴻緒奉 敕編撰

張

輔

薛 崑

高士文

黃福

劉

儁

劉 毅

陳

洽

侯 保

馮

貴

伍雲

李

慶

史 安

陳

鏞

李

彬

王通

柳

升

崔 聚

張輔字文弼，河間王玉長子也。燕師起，從父力戰，為指揮同知。玉沒東昌，輔襲職，統其兵。從戰夾河，藁城彰德靈璧皆有功。從入京師，封信安伯，食祿千石。予世券，妹為帝妃。丘福朱能言，輔父子功俱高，不可以私親故薄其賞。永樂三年，進封

新城侯加祿三百石。安南黎季犛弑其王，自稱太上皇，立子蒼爲帝。故王之孫陳天平自老撾來歸，季犛請以歸國。帝使都督黃中以兵五千送之。故大理卿薛崑爲輔，至芹站。季犛伏兵殺天平，崑亦死。帝大怒，命成國公能爲征夷將軍，輔爲右副將軍，率豐城侯李彬等十八將軍兵八十萬，會左副將軍西平侯沐晟分道進討。兵部尚書劉儁贊軍事，刑部尚書黃福、大理寺卿陳洽等給餽餉。四年九月，次龍州。十月，能卒於軍，輔代領其衆。帝遂以輔爲征夷將軍，檄季犛二十罪，進破隘留雞翎二關，道芹站，抵新福。晟軍亦至，營白鶴。安南有東西二都，依宣洮沱富良四江爲險，賊緣江南北岸立柵，聚舟其中，築城於多邦隘，城柵橋艦相連九百餘里，兵衆七百

萬，欲守險以老我師。輔軍富良江北，遣驃騎將軍朱榮破賊嘉林江，遂與晟合軍進攻多邦城。輔攻西南，晟攻東南，佯欲他攻以懈賊，令都督黃中等將死士，人持炬火銅角，夜四鼓越重濠雲梯，傅其城，指揮蔡福先登，士蟻附而上，角鳴萬炬，齊舉。城下兵謹應之，遂入城。賊驅象迎戰，以繪獅蒙馬衝之，箭礮交發，象皆反走。賊大潰，斬其帥二人，追至緞圓山，盡焚緣江木柵，俘斬無算。循富良克其東都，輯吏民，撫降附來歸者，日以萬計。遣別將李彬、陳旭取西都，又分軍破賊，援兵賊衆焚宮室倉庫，逃入海。三江州縣皆望風降。明年春，輔濟自注江，悉破籌江，困枚萬，劫普賴諸寨，斬首三萬七千餘級。賊將胡杜聚舟盤灘江，輔使降將陳封襲走之，盡得其舟，遂定

東潮諒江諸府州。季犛以舟師入犯。大敗之。木丸江斬首萬級。擒其將校百餘人。溺死者無算。追至悶海。還軍鹹水關。賊復以海艘入寇。又大破之。富良江。鹹斬數萬。江水爲赤。季犛父子以小舟遁。至海門涇。水涸棄舟走。官軍至。暴雨水漲數尺。舟畢渡。窮追至奇羅海口。獲季犛蒼。及僞太子芮。衛王澄。梁王激。并將相大臣等。檻送京師。安南平。得府州四十八。縣一百八十。戶三百十二萬。求陳氏後。不得。遂設交阯布政司。以其地內屬。自唐之亾。交阯淪於蠻服者。四百餘年。至是復入版圖。帝爲詔告天下。諸王百官奉表稱賀。六年春。輔振旅還京師。再賜宴奉天殿。帝賦平安南歌以寵之。進封英國公。歲祿三千石。予世券。其年冬。季犛黨簡定復叛。沐晟討之。敗

績。明年春。復命輔爲征虜副將軍往討之。賊黨推簡定爲越上皇。別立陳季擴爲帝。勢益張。輔就叱覽山伐木造舟。招諒江北諸避寇者復其業。遂進至慈廉州。破喝門江。克廣威州。孔目柵。遇賊鹹子關。賊舟六百餘。蔽江爲營。官軍以舟衝擊。乘風縱火。俘斬無算。擒賊帥二百餘人。盡得其舟。追至太平海口。賊黨鄧景異以三百艘迎敵。短兵接。擒斬八百餘。餘賊皆潰。於是季擴自言陳氏後。遣使求紹封。輔曰。向者徧索陳王後不應。今詐也。吾奉命討賊。不知其他。遂遣朱榮。蔡福等以步騎先輔舟師繼之。自黃江至神投海。會師清化。分道入磊江。獲簡定於美良山中。及其黨陳希葛等。檻送京師。誅之。盡殲其餘寇阮師檜等。八年春。召輔還。謁帝興和。命練兵宣

府萬全督運北征師還爲殿陳季擴等乘輔歸復出攻剽如故九年春仍命輔與沐晟討之交人苦中國約束又數爲吏卒擾往往起附賊乍服乍叛將帥益玩寇輔至申軍令都督黃中素驕違節度詰之不遜斬以徇將士惕息無敢不用命者其秋破賊帥鄧景異等於月常江獲賊舟百餘又捕斬別部賊黎蕊范慷等十年秋擊賊於神投海賊以四百餘舟分隊三銳甚輔衝其中堅賊却左右隊迭進官軍與相鉤連殊死戰自卯至己大破賊生擒渠帥七十五人賊倚荷花海謂官軍不能渡築堡守輔以舟師絕奇羅海口直薄其堡賊大潰十一年冬與晟會順州戰愛子江賊分三隊驅象數十於前行輔戒士卒一矢落象奴二矢披象鼻象奔還自蹂其衆

乘勢急擊大敗之擒賊帥五十六人追至愛母江盡降其衆明年春捕賊至暹蠻昆蒲諸柵懸崖絕險騎不得進輔與將校步行求賊往來山箐中悉擒鄧景異阮鎔等季擴走老撾遣人持檄往索師隨之破其三關遂縛季擴及其孥送京師誅之以賊所取占城地復設升華思義四州增置衛所官其降人留軍守之而還十三年春至京旋遣出鎮而餘寇陳月湖等復作亂輔悉討平之請設九水驛於防城二馬驛於龍門七遞運所於寧越規畫甚備十四年冬召輔還交人所畏者惟輔輔還一年而黎利反累遣將討之無功是時非輔莫可使而帝以輔前斬黃中心弗善故卒不遣至宣德時柳升等敗沒王通擅與賊盟倉卒還師廷議棄交趾輔爭之不能

得也。二十三年。從北征。帝崩於榆木川。受遺命總軍務。仁宗卽位。進太師。掌中軍都督府事。時大行喪滿。二十七日。尚書呂震請釋服。帝未肯。素冠麻衣以朝。而羣臣皆已吉服。惟輔與學士楊士奇服如帝。帝歎曰。輔武臣也。而知禮過六卿。由是益見親重。尋命知經筵事。監修實錄。宣德元年。漢王高煦反。憚輔潛遣人至輔所。輔執見帝。盡得其反謀。因請將兵擊反者。帝決親征。以輔扈行。平漢還。加祿三百石。輔威名轉盛。而久握兵。四年。都御史顧佐請保全功臣。詔輔解兵權。朝夕侍左右。謀畫軍國重務。進階光祿大夫。勲左柱國。朝朔望。英宗卽位。加號翊運佐理。知經筵。監修實錄如故。輔雄毅方嚴。治軍整肅。屹如山岳。三定交南。威名聞四裔。歷事四朝。連姻

帝室。而小心敬慎。善遠權勢。與三楊蹇夏等同心輔政。二十餘年。海內宴然。輔有力焉。王振擅權。文武大臣。望塵頓首。有膝行者。惟輔與抗禮。正統十四年。振以天子出塞。強輔行。不使預軍政。輔老矣。默默不敢言。至土木死於難。年七十五。追封定興王。諡忠烈。子懋九歲嗣公。憲宗閱騎射西苑。懋三發連中。賜金帶。歷掌中府後府。提督五軍營十二團營。累加至特進光祿大夫左柱國太師。成化中。嘗上言防邊事宜。詔發京營兵。作圓通寺。懋請罷其役。弘治中。御史李興彭程下獄。懋論救。復請罷作真武觀。免織造。召還中官董織者。武宗卽位。與羣小狎遊。懋帥文武大臣諫。其言皆切直。然性豪侈。後房曳羅綺者數百人。又頗脔削軍士。屢爲言者所糾。生平未

嘗一當行陣。坐享爵祿。嗣公者六十六年。其間爲太師者二十五年。握兵柄者四十年。尊寵爲勲臣冠。正德十年卒。年已七十五。贈河寧王。諡恭靖。萬曆中。與朱希忠竝奪王。子銳早死。孫崙嗣。累典營務。加太子太傅。卒贈太保。諡莊和。子溶嗣。嘉靖中。以奉冊禮。加太子太保。提督神機營。多所乾沒。數被論劾。宣府有警。溶方偕諸公侯。閱勲衛子弟。訛言寇至。棄而走。坐奪營務。尋起僉書左府。屢典前府後府軍務。萬曆中卒。三傳至曾孫世澤。流寇陷京師。被殺。

薛崑。閩鄉人。洪武中。以薦除鎮江知府。沈毅有清操。能懾豪強。建文三年。召爲大理左少卿。燕王駐軍大名。方孝孺建議草詔。令崑齎赴燕軍。又爲宣諭數千言。書千紙。令密散燕將。

士崑見燕王曰。上言殿下且釋甲謁孝陵。暮則盡撤諸軍。王叱曰。事至此尚誰欺。左右請殺之。王曰。此天子使也。釋之歸。燕王稱帝。遷大理卿。尋謫廣西。會帝使黃中護陳天平歸國。中舉崑爲輔。至芹站。伏發死之。

高士文。咸寧人。洪武中。以小校從大軍。征雲南及金山。有功。爲燕山左護衛百戶。質直剛果。善騎射。北平兵起。從戰皆有功。累進都督僉事。永樂四年。從張輔征交趾。黎季犛旣擒。餘黨竄七源山谷中。出沒爲寇。士文率所部敗之。廣源進圍其山寨。晝夜急攻。寨垂破。賊突走。士文追與戰。中礮死。所部復追賊。賊失巢。竟潰散。他將至。遂滅賊。朝廷念士文功。追封建平伯。令其子福嗣。食祿千三百石。與世券。福傳子遠。遠傳弟。

進。進傳從子。露。露無子。義子李繼宗。詐爲嗣。事覺。奪爵。遂絕。士文死之明年。交趾鄧景異攻盤灘。守將徐政死之。政儀真人。建文時。爲揚州衛副千戶。燕師至。以城降。累遷都指揮。同知。從征交趾。奪賊船於三帶江。以濟大軍。拔西都。戰鹹子關。皆有功。陳李擴反。盤灘地最要。張輔遣政守之。賊來攻。與戰。飛鎗貫脇。猶督兵力戰。竟敗。賊退。腹潰而死。

黃福。字如錫。昌邑人。洪武中。以大學生。爲項城主簿。改清源。歷金吾前衛經歷。上書論國家大計。太祖奇之。超拜工部右侍郎。建文時。深見倚任。燕王列奸黨二十九人。福與焉。王入京師。福迎附。李景隆指福奸黨。福曰。臣固應死。但目爲奸黨。則臣心未服。置不問。復其官。尋轉左侍郎。未幾拜工部尚書。

永樂三年。陳瑛劾福不恤工匠。改北京刑部尚書。明年。言官劾福前掌工部。與侍郎趙毅劉仲廉。隱所貯軍資。弗奏。而請斂於民。逮下詔獄。已復職。督安南軍餉。旣郡縣其地。命以尚書兼掌布政按察二司事。時遠方初附。軍旅未息。庶務繁劇。福隨事制宜。咸有條理。上疏言。交趾賦稅。輕重不一。請酌定其制。務從輕省。又請循瀘江北岸。至欽州。設衛所。置驛站。以便往來。開中積鹽。使商賈輸粟。以廣軍儲。官吏糧廩。倉粟不足。則給公田。又言。廣西民餽運交趾。陸路艱險。宜令廣東海運二十萬石。以給。皆報可。於是編氓籍。定賦稅。興學校。置官師。數召父老。宣諭德意。戒屬吏毋苛擾。一切鎮之以靜。上下帖然。時羣臣以細故。謫交趾者相望。福咸加拯恤。甄其賢者。

與共事。由是至者如歸。鎮守中官馬騏。怙寵虐民。福數裁抑之。騏誣福有異志。帝察其妄。不問。仁宗卽位。召還。命兼詹事輔太子。福在交趾。凡十九年。及還。交人扶攜走送。號泣不忍別。仁宗崩。督獻陵工。宣德元年。馬騏激交趾復叛。時陳洽以兵部尚書代福。累奏乞福還撫交人。會福持節出封王。卽日召還。敕曰。卿惠愛交人久。交人思卿。強爲朕再行。乃以工部尚書兼詹事。仍領交趾布政按察事。比至。柳升失律敗死。福奔還。至支稜關。爲賊守關者所得。福欲自殺。賊力持之。羅拜曰。公不北歸。我曹不至此。饋白金餼糧。肩輿送出境。至龍州。盡取賊遺歸官。還爲行在工部尚書。四年。與平江伯董漕事。議令江西湖廣浙江。及江南北諸郡民。量地遠近。轉粟於淮。

安徐州臨清。而令軍接運至北京。民大稱便。五年。福陳足兵食省役之要。其言足食。謂永樂間。雖營建北京。南討交趾。北征沙漠。費用未嘗乏。比國無大費。而歲用僅給。卽不幸有水旱征調。將何以濟之。請役操備營繕軍士十萬人。於濟寧以北。衛輝真定以東。緣河屯種。初年自食。次年人收五石。三年收倍之。旣省京倉口糧六十萬石。又省本衛月糧百二十萬石。歲可得二百八十萬石。帝善之。下行在戶兵部議。郭資張本言。緣河屯田實便。請先以五萬頃爲率。發附近軍民五萬人墾之。但山東近年旱饑。流徙初復。衛卒多力役。宜先遣官行視田。以俟開墾。帝從之。遣吏部郎中趙新等。經理屯田。福總其事。旣而有言。軍民各有常業。若復分田。役益勞擾。事竟

不行。改戶部尚書。七年。帝宮中覽福漕事便宜。出其章。示楊士奇曰。福言智慮深遠。六卿中誰倫比者。對曰。福受知太祖。正直明果。一志國家。永樂初。建北京行部。綏輯凋瘵。及得交趾總藩憲。具有成績。誠六卿所不及。福年七十矣。諸後進少年。高坐公堂。理政事。揚揚出入。福四朝舊人。乃朝暮奔走勞悴。殊非國家優老敬賢之道。帝曰。非汝不聞此言。士奇又曰。南京根本重地。先帝以儲宮監國。福老成忠直。緩急可倚。帝曰。然。明日命吏部改福南京戶部尚書。明年兼掌南京兵部。諸大臣多依違承順。福持正不阿。以故南出。英宗卽位。加少保。參贊南京守備襄城伯李隆機務。留都文臣參機務。自福始。隆用福言。政肅民安。正統五年卒。年七十八。福丰儀修整。

不妄言笑。歷事六朝。多所建白。公正廉恕。素孚於人。當官不爲赫赫名。事微細無不謹。憂國忘家。老而彌篤。自奉甚約。妻子僅給衣食。所得俸祿。唯待賓客周匱乏而已。初成祖手疏大臣十人。命解縉評之。惟於福無少貶。福參贊南京時。嘗坐李隆側。士奇寄聲曰。豈有孤卿而旁坐者。福曰。焉有少保而贊守備者邪。卒不變。然隆待福甚恭。公退卽推福上坐。福亦不辭。士奇之省墓也。道南京。聞福疾。往候之。福驚曰。公輔幼主。一日不可去。左右奈何遠出。士奇深服其言。兵部侍郎徐琦使安南回。福與相見。石城門外。或指福問安南來者曰。汝識此大人否。對曰。南交草木。亦知公名。安得不識。福卒。贈諡不及。士論頗不平。成化初。贈太保。諡忠宣。

劉儁字子士。江陵人。洪武十八年進士。除兵部主事。歷郎中。遇事善剖決。為帝所器。二十八年擢右侍郎。建文時為侍中。成祖即位。進尚書。永樂四年大征安南。以儁參贊軍務。儁為人。縝密勤敏。在軍佐畫籌策有功。還受厚賚。未幾簡定復叛。儁再出參贊沐晟軍務。六年冬。晟與簡定戰。生厥江。敗績。儁襲賊至大安海口。颶風大作。揚沙晝晦。且戰且行。後軍不繼。賊圍之數重。被執不屈。罵賊死。帝為輟朝。賜賻及葬祭。皇太子諸王皆遣祭。仁宗即位。復賜祭。贈少傅。諡節愍。官其子奎給事中。與儁同死者。呂毅。劉昱。毅。項城人。以濟南衛百戶。從成祖渡江。積功至都督僉事。與同官黃中。充左右副將軍。佐征南將軍韓觀鎮廣西。尋與中將兵。送故安南王孫陳天平。

歸國。至芹站。天平被劫去。坐奪官。帝薄毅罪。起為鷹揚將軍。從張輔討黎季犛有功。掌交阯都司事。至是與賊戰。深入陷陣死。昱。武城人。自吏科給事中。遷左通政。出為河南參政。改交阯。嚴猛。有治材。吏民畏憚。軍敗亦死之。陳洽字叔遠。武進人。好古力學。與兄濟弟浚並有名。洪武中以善書薦。授兵科給事中。嘗奉命閱軍。一過輒識面目。記姓名。有再至者。輒叱去。帝嘉其能。賜金織衣一襲。父戍五開。歿洽將奔喪。會武開蠻為變。道梗。冒險間行。卒負父骨以歸。建文中。以茹瑺薦。起復授文選郎中。成祖即位。擢吏部右侍郎。改大理卿。永樂四年。大軍討安南。洽出贊軍務。主饋餉。調土兵以益軍。安南平。轉吏部左侍郎。是時黃福兼掌布按二司。

事專務寬大拊循其民。洽甄拔才能，振以風紀，覈將士功罪，建置士官，經理兵食，剖決如流。還朝，命兼署禮部工部事。七年，復參張輔軍事，討簡定平之。還從帝北征，與輔練兵塞外。九年，復與輔往交趾，討陳季擴。居五年，還朝，進兵部尚書。復往贊李彬軍事。仁宗召黃福還，以洽掌布按二司事，仍參軍務。中官馬騏暴斂毒軍民，洽等不能制，反者四起。黎利尤桀黠，而榮昌伯陳智都督方政不相睦，寇勢日張。洽上疏言：「賊雖乞降，內懷詭詐，黨羽漸盛，將不可制。乞諭將速滅賊，毋為賊所餌。」宣宗降敕切責智等，令進兵。復敗於茶籠州，帝乃削智政官爵，命成山侯王通佩將軍印討黎利。仍命洽贊其軍。宣德元年冬，師至應平之寧橋，臨沙河欲渡。洽與諸將言：「地

險惡，恐有伏，宜且駐師覘賊。通不聽，麾兵徑渡，陷泥淖中。伏發，官軍大敗。洽躍馬入賊陣，創甚，墜馬。左右欲扶還營，洽張目叱曰：「吾為國大臣，食祿四十年，報國在今日，義不苟生。」揮刀殺賊數人，自剄死。事聞，帝歎曰：「大臣以身殉國，一代幾人。」尋贈少保，諡節愍。官其子樞，刑科給事中。自黎利反，出入三四年，將吏先後死者甚眾。侯保贊，皇人，由國子生，歷知襄城、贛榆、博興三縣，有善政。交趾初設府縣，擇人撫綏，以保知交州府。遷右參政。永樂十八年，黎利反，保以黃江要害，築堡守之。賊至，力拒數月，出戰不勝死。馮貴，武陵人，舉進士，為兵科給事中。從張輔征交趾，督兵餉，還奏其地富實，產金珠，遂擢交趾右參議，提督金湯。尋遷左參政。涖事明敏，善撫流亾。土

兵二千人。驍果善戰。貴撫以恩。數擊賊有功。中官馬騏盡奪之。黎利反。貴以羸卒數百。禦賊於瑰縣。力屈而死。仁宗時。尚書黃福言狀。贈貴左布政使。保右布政使。伍雲。定遠人。以荊州護衛指揮同知。從征交趾。破坡壘。隘留多邦城。拔東西二都。皆有功。賊平。調昌江衛。仁宗初。隨方政討黎利於茶籠。鼓勇陷陣死之。陳忠。臨淮人。初爲寬河副千戶。以靖難功。積官指揮同知。坐事戍廣西。從軍交趾。於箇招市。昇小舟入江。劫黎季犛水寨。破之。攻多邦城。先登。論功還。故官。調交州左衛。戰鹹子關。安謨海。追賊奇羅。荷花海口。及昆傳山。咸有功。進都指揮同知。征東潮州。擒僞知院阮事。及龍虎大將軍吳忠。至是黎利寇清化。忠戰死。仁宗憫之。與雲皆優恤如制。李任。

永康人。以燕山衛指揮僉事。從成祖起兵。累功爲遼東都指揮同知。宣德元年。從征黎利。守諒江。賊旣獲。都督蔡福。令福招任降。在於城上罵福曰。汝爲大將。不能殺賊。反爲賊用。狗彘不食汝餘。發礮擊之。賊擁福去。大集兵象。飛車衝梯。薄城環攻。任與指揮顧福。率精騎盪擊。燒其攻具。賊又築壘。臨射城中。鑿地道潛入城。任福隨方禦之。死守九月餘。前後三十戰。糧竭力盡。賊乘城入。猶率死士三戰三敗之。賊驅象大至。任福不能支。皆自剄死。內官馮智。指揮劉順。知府劉子輔。俱自縊死。城中軍民婦女。不屈死者數千人。子輔。廬陵人。由國子生。擢監察御史。巡按浙江三年。性廉儉。用法公平。浙人德之。按察使周新。不苟許與。獨稱子輔賢。遷廣東按察使。坐累。

左遷諒江知府。善撫循其民。黎利反。他郡縣多陷。惟子輔與守將集兵民死守。城破。子輔曰。郡亾吾亾。義不污賊刃。卽自縊死。一子一妾皆死。何忠字廷臣。江陵人。由進士爲監察御史。廉慎不妄交。與莫敢干以私。永樂中。三殿災。言事忤旨。出爲政平知州。民安其政。寧橋之敗。王通詭與賊和。而請濟師於朝。爲賊所遮。不得達。賊遣頭目陳渭老奉表入謝。通乃遣忠及副千戶桂勝與偕行。以奏還土地爲辭。實令請兵。至昌江。內官徐訓泄其謀。賊遂拘忠。賦詩以死。自誓。賊知忠賢。說令從已。忠不聽。臨以白刃。忠瞋目罵不絕聲。又以刃脅勝。勝亦怒罵不屈。忠父子及勝。同日被殺。徐麒。桂林中衛指揮使。調征交趾。與南寧千戶蔡頤守丘温。賊圍之久。糧盡。將吏多

棄城遁去。麒與頤猶率所部固守。城陷。皆自縊死。無一降者。易先。湘陰人。以國子生授諒山知府。有善政。歲滿還朝。郡人相率詣巡按御史乞留。御史以聞。詔進秩三品。令還任。賊破諒山。先自縊死。周安。以指揮僉事守備。又安黎利勢張。都督蔡福召諸將議曰。芻糧將盡。不如退就東關。衆皆諾。千戶包宣遂以其衆詣賊降。安等趨東關。至富良江。爲賊所蹙。俱陷。賊逼遣蔡福詣諸城說降。守將安憤甚。潛與衆謀。伺官軍至。爲內應。包宣覺之。以告利。利收安將殺之。安曰。吾天朝臣子。豈死賊手。與指揮陳麟躍起。奪賊刀殺數人。皆自刎死。所部九千餘人。悉被殺。交趾布政使弋謙。以在等十二人死事聞。宣宗歎息。贈任都督同知。福順麒都指揮同知。安指揮同知。

顯指揮僉事。勝正千戶。竝令其子孫承襲。子輔先布政司參政。忠府同知。智太監。竝予誥賜祭奠。惟麟嘗與朱廣開門納賊。故贈恤不及。已而黎利稱臣。歸蔡福朱廣等六人於京師。盡棄市籍其家。

李慶字德孚。順義人。洪武中。以國子生。署都察院右僉都御史。後授刑部員外郎。遷紹興知府。永樂元年。召為刑部右侍郎。性剛果。有幹局。馭下甚嚴。帝以為才。數命治他事。不得時。至部。然屬吏與罪人交通。私饋餉。慶輒知之。繩以重罰。五年。改都察院右副都御史。兩遭親喪。竝奪哀視事。列侯都督。多令家人子弟。行商中鹽。為官民害。慶言。舊制四品以上官員。家不得與民爭利。今都督蔡福等。既行罰。公侯有犯。亦乞按

問。帝命嚴禁如制。忻成伯趙彝。擅殺運夫。盜賣軍餉。都督譚青。朱崇。貪縱不法。慶皆劾之。下青詔獄。彝崇法司。已劾都督費瓛。欺罔。梁銘貪暴。鎮守德州都督曹得。贖貨。皆被責。中外凜其風采。十八年。進工部尚書。尋兼領兵部事。仁宗立。拜兵部尚書。加太子太保。弋謙以言事忤旨。呂震等交口詆之。惟慶與夏原吉無言。帝尋悟。降敕自責。竝責震等。震等甚愧。此兩人。山陵事多趣辦。中官有求執不與。至相詆訐。不為動。人多嚴憚之。號為生李。奉命侍皇太子。謁孝陵。約束將士。秋毫無擾於民。太子欲獵。屢諫止。遂留南京。兵部宣德二年。安遠侯柳升討黎利。慶參贊其軍事。奉詔擇部曹賢能。自隨。所擇十數人。師人交趾。連破賊柵。至鎮夷關。升意殊輕賊。不為備。

郎中史安。主事陳鏞。言於慶曰。柳將軍辭色皆驕。驕者兵家所忌。賊或示弱以誘我。未可知。防賊設伏。璽書告誡甚切。公須力爲將軍言之。時慶已病甚。強起告升。升不聽。直前中伏。敗歿。慶病遂篤。明日亦死。一軍盡沒。安鏞及李宗昉。潘禪皆死之。安字志靜。豐城人。廉重好學。由進士。授禮部主事。遷儀制司郎中。鏞字叔振。錢塘人。由庶吉士。授祠祭司主事。楊士奇稱其清介端確。表裏一出於正。宗昉不知何許人。亦以主事從。禪鄞人。以後軍都事從。禪嘗勸升宜持重廣偵探。引芹站寧橋事爲戒。升不聽。升敗。禪格鬪死。

李彬字質文。定遠人。父信。從太祖渡江。積功爲濟川衛指揮僉事。彬嗣職。從潁國公出塞。歷朶顏鴉兒山。轉戰洮河黑嶺。

寒山黑松林熊皮山。斬獲多。還與築諸邊城。燕師起爲前鋒。轉戰皆有功。累遷右軍都督僉事。永樂元年。封豐城侯。食祿千石。予世券。明年。出鎮江西。移廣東。召捕皂君山寇。四年。以左參將。從張輔征交趾。別將破其西都。敗賊木九江。斬阮磊等。還加祿五百石。充總兵官。練舟師。備倭海上。移兵討長沙賊李法良擒之。又帥浙閩兵。捕海寇。十年。命往甘肅。與西寧侯宋琥。經略降酋。彬與柳升。嚴兵境上。而令土官李英。防野馬川。涼州酋老的罕果叛。走野馬川。都指揮何銘戰死。英追躡盡俘其衆。獨老的罕走赤斤蒙古。不獲。帝遣庶子楊榮。就彬謀發兵。彬言道險遠。餽餉難繼。遂罷兵。明年。召西寧侯還。而命彬佩征虜前將軍印。總兵鎮甘肅。赤斤蒙古。縛老的罕。

以獻。帝嘉彬功，賜賚甚厚。十二年，從北征，領右哨，破荅里巴可汗。於忽蘭忽失溫，追奔至土刺河，師還受上賞。移鎮陝西。十五年，命佩征夷將軍印，總兵鎮交趾。至則破擒陸那賊阮貞，遣都督朱廣等平順州及北晝諸寨。明年，黎利據清化以叛，彬遣廣討之，斬首六百餘級，生擒范柳、范宴等百餘人，利遁去。明年，遣都督同知方政襲利於可藍柵，獲其將軍阮箇立等，利走老撾。師還復出寇，都指揮黃誠擊走之。又敗之磊江，追敗之忙心河，遂竄伏不出。而交人反者四起，彬遣諸將分道討。方政討車綿子等於嘉興，鄭公証於南策，丁宗老於大灣，朱廣討阮多譚、興邦等於別部。都指揮徐諤討范軟於俄樂，指揮陳原瑰討陳直誠，陳順慶於惡江。都指揮王忠討

楊恭於峽江，悉破擒之。而賊勢尤劇者，彬輒自討。潘僚者，又安土知府也，爲中官馬騏所暴反，衙儀彬擊之，走玉麻州。師從之，僚以紅衣軍迎戰，破擒其酋，追奔至潭山，悉焚僚柵。僚竄老撾，遣都指揮師佑擊之。僚以老撾兵駕象迎戰，大破之。於農巴林，悉降其衆。范玉者，塗山寺妖僧，反東潮州，自稱羅平王，置官屬。彬討之，賊迎戰江中大敗，玉脫走，獲之東潮，遂平之。而鄭公証之黨黎姪，數出沒爲寇，都指揮黃忠、張貴累敗之。小黃江鎮蠻府，彬自將追捕，并其黨送京師。於是諸賊悉平。惟黎利未獲，彬以餽運不繼，請屯田。令官軍與土軍錯酌屯守，征行多寡之數以聞。帝善之，將發兵入老撾，索利。老撾懼，請自捕利以獻。會彬疾作而罷。二十年春，彬卒，贈茂國

公諡剛毅子賢嗣侯宣德三年從北征還修永寧隆慶諸邊城正統初佩征西將軍印鎮大同尋守備南京掌中右二府事事多廢屢被論景泰初卒贈豐國公諡忠憲子勇嗣掌中府總京營兵守備南京卒子璽嗣嗣二十五年卒無子庶兄旻嗣正德中總兵鎮貴州擒思南石阡流賊平武定諸蠻有功加太子太傅歷掌南京中左二府嘉靖初佩平蠻將軍印鎮湖廣有威惠楚人安之徙兩廣武定侯郭勛典京營以罪罷世宗以旻方遠鎮無內黨擢代勛尋被劾罷卒諡武襄無子從子熙嗣提督三千營出鎮湖廣楚世子獄株連甚衆熙言於御史平反二百餘人討平沅州麻陽叛蠻還掌前府提督九門總京營戎政卒無子從子儒嗣出掌南後府卒子環

嗣萬曆中分典營務提督操江上便宜十事守備南京兼掌中府率南五府請行皇長子冠婚禮不報定應天府劫囚之變居南京數年卒子承祚嗣天啓初上書言便宜兵部覆寢之恚而求罷不聽掛冠徑去坐停祿已附魏忠賢得起視營務數言事請設海外督理內臣採珠廣東開鼓鑄皆希忠賢指最後請子忠賢九錫崇禎初下獄奪爵戍邊復封其子開先爲伯都城陷被殺

王通咸寧人贈金鄉侯真子嗣父官爲都指揮使將父兵轉戰有功累進都督僉事復以父死事故封武義伯食祿千石子世券永樂七年作天壽山營長陵十一年進封成山侯加祿二百石明年從北征領左掖破敵土刺河二十年復從出

塞以大軍殿。連出塞竝領右掖。仁宗卽位。命掌後府。加太子太保。時豐城侯彬鎮交阯。已前卒。而榮昌伯陳智都督方政以參將代鎮。不協。黎利益張。數破郡邑。殺將吏。智出兵數敗。宣宗乃削智爵。而命通佩征夷將軍印。帥師往討。未至。利弟善攻交州城。都督陳濬等擊却之。參將馬瑛破賊清威。通與合至。應平之。寧橋諸將言。地險惡。疑有伏。通不從。麾渡橋。人馬行泥淖中。不能成列。伏四起。軍大潰。死者二三萬人。尚書陳洽與焉。利聞之。自將精卒圍東關。通氣沮。陰遣人許爲利乞封。而檄清化迤南地歸黎氏。按察使楊時習執不可。通厲聲叱之。清化守羅通亦不肯棄城。與指揮打忠堅守却賊。朝廷遣柳升等助通。未至。二年二月。利攻城。通以勁兵五千出。

不意擣賊營。大破之。斬其司空丁禮。司徒黎豸。以下萬餘級。利惶懼欲走。諸將請乘勝急擊。通猶豫。賊得樹柵掘濠塹。四出攻掠。遂分兵陷昌江諒山。而圍交益急。通斂兵不出。利乞和。通以聞。會柳升戰歿。通益懼。更啗利和。教利僞立陳髡爲陳氏後。輒立壇與利盟。約退師。因宴利。遺利錦綺。利以重寶謝通。通爲馳上表。輒引兵還南寧。廷議亦厭兵。竟封利。交阯內屬二十餘年。至是復失之。官吏軍民後還者八萬六千餘人。其陷於賊。及爲賊所戮者。不可勝計。由通失律。遷愞。擅與賊和。不待命。輒還師故也。通還京。羣臣交劾。論死繫獄。奪券籍其家。正統四年。特釋爲民。英宗北狩。邊事急。起通都督僉事。守京城禦也。先有功。進同知。守天壽山。景泰三年卒。子琮。

以天順元年。詔得嗣成山伯。持節冊封崇陽王妃。坐受餽下獄。久之復爵。佩征虜前將軍印。鎮遼東。破敵義州。成化初。署南京後府。卒。子鏞嗣。累典營務。加太子太傅。子原券。卒。子洪乞嗣。吏部言。通罪廢。琮嗣。伯以特恩。鏞時未許。世嗣執不許。詔以原券有世襲文。子洪嗣。傳至孫應龍。掌中府。卒。子允中嗣。守備南京。至明亾乃絕。

柳升。懷寧人。襲父職為燕山護衛百戶。大小二十餘戰。累遷左軍都督僉事。永樂四年。從張輔征交趾。戰魯江。疾鬪。大破賊。斬賊帥阮子仁等。守鹹子關。賊入富良江。舟亾十餘里。陸兵數萬。又以海舟截江立柵。輔將步騎升水軍。夾攻。大敗之。獲偽尚書阮希周等。又敗賊於奇羅海口。得舟三百。部卒得

李聲及其子澄。還封安遠伯。食祿千石。子世券。七年。同陳瑄捕倭。至青州海中。大破倭。追至白山島而還。八年。副清遠侯王友將中軍。從北征。至回曲津。以神機火器為前鋒。礮發。震數十里。每矢洞二人。中旁馬立斃。大敗阿魯台。進封侯。加祿五百石。仍世伯。佩平羌將軍印。鎮寧夏。追討叛將馮荅蘭帖木兒。捕斬叛酋察罕歹等。入總京營兵。十二年。復從北征。將大營兵。戰於忽失溫。復以神機火器。大破敵師。還加太子太傅。子世侯。十八年。妖婦唐賽兒反益都。命升與都指揮劉忠將京軍往討。圍其寨。升自以大將意。輕賊。賊乞降。信之。夜為所襲。忠中流矢死。官軍多創。賽兒遁去。及明始覺。追獲其黨百餘人。軍所過頗擾。都指揮衛青力戰完安丘。升忌其功。摧

辱之。師還，劾下獄，已得釋。二十年，復從北征，將中軍，破敵於屈裂河。明年，復從出塞，降也先土干之衆。又明年，出至荅蘭河，不見敵而還。帝凡五出塞，升皆從，數有功，寵甚厚。諸徹侯大校，無與比者。仁宗卽位，命掌右府，加太子太傅。宣德元年冬，成山侯王通征交趾，敗書聞，乃以升爲征鹵副將軍，充總兵官。保定侯梁銘爲左副總兵，都督崔聚爲左參將，尚書李慶參贊軍務，率步騎七萬人，會黔國公晟討黎利。二年九月，入隘留關，利僞爲國人上書，請立陳氏後者，升不啓封，趣進兵，連破關隘數十，直抵鎮夷關。升意殊輕賊，禮部郎中史安主事陳鏞亟言於慶，宜設備。時慶及銘皆病甚，慶強起告升，升不爲意。前至倒馬坡，與百餘騎先馳度橋，橋遽壞，後隊絕。

進陷泥淖中，伏發，升中鏢死。其日銘病卒。明日慶亦卒。聚整軍至昌江，賊來益衆，官軍殊死鬪，賊驅象大至，陣亂，賊大呼降者不死，官軍或死或走，無降者。安鏞、李宗昉等皆死。崔聚者，懷遠人，從成祖起兵，從北征，敗敵於廣漠戍，累遷左軍都督僉事。至是力戰被執，賊百計降之，終不屈死。升質直寬和，善撫士卒，勇而寡謀，遂及於敗。朝議以升喪師，不令子溥襲爵。久之乃許。正統十二年，贈升融國公，諡襄敏。溥初掌中府，出鎮廣西，廉慎，然無將略。承山雲後，不能守成法，過於寬弛。於是猺獞相扇爲亂，初征大藤峽，斬賊帥楊容拾等，已討柳州蠻，破石門諸寨，討思恩蠻，破禽韋萬川等，而賊滋蔓如故。景泰初，兵事亟，召還掌右府，總神機營，再出鎮廣西，禁軍以

溥有威惠。乞留之不果。天順初召還。仍掌右府。防邊宣府大同。累進太傅。益歲祿三百石。陝西有邊警。命佩平鹵大將軍印。敵再入涼州。溥閉壁不出。敵飽掠去。躡取數十級。報捷被劾。落太傅閒住。既而以馬駝獻。帝怒却之。尋復起掌神機營。卒諡武肅。子承慶未嗣而卒。孫景嗣。成化末。佩印鎮兩廣。討鬱林叛蠻。破其巢三十八。俘斬甚衆。坐貪暴論死。宥出卒。子文嗣。正德初。鎮兩廣。平廣西樂昌賊。又與都御史林廷選。平懷賀連山諸徭。破其巢二百。擒斬六千。召入典營務。出鎮湖廣。僉書南中右府。卒。子珣嗣。復鎮兩廣。討平斷藤峽弩灘諸徭。加太子少保。嘉靖十九年。佩征夷副將軍印。總諸軍征安南。莫登庸懼而乞降。論功加太子太傅。又與侍郎蔡經會兵。

討定思恩九巡司。又討瓊州黎。擒斬五千。誅其酋三十人。加少保。卒贈太保。諡武襄。子震嗣。僉書前府右府。出鎮湖廣。掌南右府。萬曆中卒。明亡爵絕。

梁銘。汝陽人。洪武中。襲父職爲燕山前衛百戶。燕師起。從世子守北平。南兵圍城。戰甚力。積功至後軍都督僉事。侍太子監國南京。永樂九年。坐事下獄。十九年。赦復職。副都督胡原。捕倭廣東。仁宗卽位。進都督同知。以參將鎮寧夏。追論守城功。封保定伯。食祿一千石。子世券。宣德初。御史石璞劾銘貪黷。徵下獄。當奪爵。宥而復之。副柳升征交阯。至鎮夷關病卒。銘勇敢善戰。能得士卒心。銘死。官軍遂沒。子珣嗣。伯。正統十四年。福建盜鄧茂七反。充副總兵往征之。比至茂七已誅。破

餘賊九龍山。斬首九百。奏捷班師。而賊黨復作。言官劾欺罔。謫充為事官。從石亨立功復爵。景泰元年。貴州苗叛。靖遠伯王驥討之無功。乃命瑤為平蠻將軍。充總兵官。代驥。其冬分四道進攻。賊拒戰。奮擊大敗之。斬首七千有奇。生擒四百八十。破寨五百。明年。自沅州發兵由東路。與都督方瑛破賊於興澤。又大破之香鑪山。俘偽王韋同烈等。擒斬數千。分遣諸將攻都勻草塘。諸苗悉震恐。降者數千。師還。苗復叛。掠普定永寧。瑤復與瑛討平之。論功進侯。益祿五百石。四年。討平湖廣清浪叛苗。天順元年。出鎮陝西。破敵涼州。又破敵靖鹵堡。召還理左府事。成化初。卒。贈蠡國公。諡襄靖。瑤天資平恕。數總兵柄。未嘗妄殺一人。子弟從征。以功授官。輒辭不受。人以

為賢。三傳至孫永福。嘉靖初。掌南右府。提督五軍營。卒。子繼璠嗣。領將軍宿衛。歷掌南左府。充漕運總兵。萬曆中卒。子世勳嗣。崇禎初。提督京營。京師陷。遇害。

明史藁

列傳第三十一終

075
02

横雲山人集 列傳三十一

三

日
本
書
院

内
閣
書
院

東京
大学
図書
印

075-05

